

四庫全書

經部

欽定四庫全書

經部  
欽定春秋傳說彙纂卷四

詳校官監察御史<sub>臣</sub>陳化龍

給事中<sub>臣</sub>溫常綬覆勘

總校官進士<sub>臣</sub>繆琪

校對官中書<sub>臣</sub>孫希旦

膳錄監生<sub>臣</sub>劉灃

膳錄監生<sub>臣</sub>劉璿

欽定四庫全書

欽定春秋傳說彙纂卷三

乙桓王  
四年

七年

齊僖十五年晉哀二年曲沃武公稱元年  
衛宣三年蔡宣三十四年鄭莊二十八年

曹桓四十一年陳桓二十九年杞武三十五年  
宋襄四年秦文五十年楚武二十五年

春王三月叔姬歸于紀

穀梁

其不言逆何也逆之道微無足道焉爾

胡傳

叔姬伯姬之娣非夫人也則何以書古者諸侯一娶九女必格之同時者所以定名分室亂源

也今叔姬待年於宗國不與嫡俱行則非禮之常所以書也  
若山蘇轍以謂書叔姬賢之也若賢不得書

必貴而後書則是以位而茂德也小國無大夫至於接我則書是位不可以廢事也位不可以廢事而獨可以廢賢乎如叔姬不歸宗國而歸于鄆以全婦道賢可知矣賢而得書亦春秋之法也

集說

何氏休曰叔姬者伯姬之媵也至是乃歸者待年父母國也婦人八歲備數十五從嫡二十承

事君子媵賤書者後為嫡終有賢行紀侯為齊所滅紀季以鄆入于齊叔姬歸之能處隱約全竟婦道故重錄之范氏甯曰媵之為言送也從也不與嫡俱行非禮也姪娣年十五以上能共事君子可以往娣他國皆有姪娣與適俱行則所尊在適書適不書姪必少於嫡知未二十而往也孔氏穎達曰女嫁於娣叔姬待年之女年滿特行故書其歸魯女嫁於他國之卿皆書之夫人之娣尊與卿同其書故是常例賈云書之者刺紀貴叔姬傳無其事是妄說也孫氏復曰媵書者為莊十二年歸于鄆起程子曰伯

姬為紀侯夫人叔姬其姊也待年於家今始歸姊歸不書憫其無終也高氏閱曰姊亦書歸若堯之二

女降于為汭皆曰嬪張氏洽曰媵不書此特書者以其終不忘紀之五廟雖紀侯卒而歸于鄆以奉宗

祀沒其身而後已聖人以其賢可以厲婦行將有其未必錄其本是以變例而特書之趙氏與權曰伯

姬歸紀踰五年而叔姬歸焉卒之紀侯去其國而伯姬葬于齊紀季以鄆入于齊而叔姬歸于鄆二姬皆

不得其所終春秋之法有其終必有以見其始也

# 滕侯卒

滕國杜注在沛國公丘縣東南今山東兗州府滕縣西南十五里有古滕城即滕國也孔疏譜

云滕姬姓文王子錯叔繡之後武王封之居滕

# 公羊

何以不名微國也微國則其稱侯何不嫌也春秋貴賤不嫌同號美惡不嫌同辭

胡傳

滕侯書卒何以不葬急於禮弱其君而不葬者

之強弱而有謹慢也不以情之疎密而有厚薄也春秋之時異於是晉北國也楚南邦也地非同盟而親

往俟其葬滕鄰境也宿同盟也計告雖及而魯不之恤豈非以其壤地褊小乎急於禮而不往弱其君而

不會無其事而闕其文此魯史之舊也聖人無加損焉存其卒闕其葬而義自見矣卒自外錄不卒非外

也葬自內錄  
不葬非內也

集說

孔氏穎達曰侯訓君也五等之主雖爵命小異而俱是國君故總稱諸侯也劉氏敞曰左氏

云不書名未同盟也非也嘗同盟者卒未必皆名未嘗同盟者卒未必皆不名程子曰不名史闕文也

其名也不葬魯不往會史佚其謚是以失書不容鑿

為之說

夏城中丘

此書土功之始中丘杜注在琅瑯臨沂縣東北今山東兗州府沂州東北三十里有中

丘城

左傳

書不時也

公羊

中丘者何內之邑也城中丘何以書以重書也

穀梁

城益城為保民為之也民衆城小則益城益城無極凡城之志皆譏也

集說

范氏甯曰建國立城邑有定所高下大小存乎王制刺公不修勤德政更造城以安民夫保民

以德不以城也孫氏復曰城邑宮室高下大小皆有王制不可妄作是故城一邑新一殿作一門築一

國時與不時皆詳而錄之時謂周之十二月夏之十月非此不時也得其時者其惡小非其時者其惡大此聖人愛民力重興作懲僭忒之深旨也葉氏清臣曰城郭雖立以為國非恃以守國故先王歲因農隙修之於無事之時而城多出於畏齊畏晉畏邾畏莒不然則大夫強而自城其邑或過其度未有無故而為也既不能愛恤其民以時舉其政事至而旋為之備以奪其時此經之所以書也程子曰為民立君所以養之也養民之道在愛其力民力足則生養遂生養遂則教化行而風俗美故為政以民力為重也春秋凡用民力必書其所興作不時害義固為罪也雖時且義必書見勞民為重事也後之人君知此義則知慎重於用民力矣然有用民力之大而不書者為教之意深矣僖公修泮宮復闕宮非不用民力也然而不書二者復古興廢之大事為國之先務如是而用民力乃所當務也人君知此義則知為政之



先後輕重矣凡書城者完舊也書築者創始也城中丘使民不以時非人君之用心也胡氏寧曰穀梁

子之意為春秋時言之也城不可無而未為國之急易所謂設險非止於築城禮所謂城池亦固國之一事爾春秋凡城必書或志其非時或志其非制或志其非所得其時制又當其所而亦書重民力也文王以民力為臺為沼或與民同其利或與民同其樂則不可以已矣吳氏澂曰君之資於民者資其力也故無事則資其力而用之於農以足食生財有事則資其力而用之於兵以敵愾禦侮非農非兵而勞民之力必以其時以其禮而不敢妄興不得已而役之亦必節其力而不盡也春秋凡力役必書重民力也

汪氏克寬曰內城二十三春城四夏城七冬城十二左傳於此年并城郎祝丘及新延廡新作南門築鹿圓皆曰不時凡城於冬者皆曰書時或曰周之冬十月十一月乃夏之秋周之春正月二月乃夏之冬

而左氏於城向諸防諸鄆平陽中城城防郎園皆曰  
書時延廡南門亦曰不時何哉今考左傳言龍見而  
戒事則夏之九月而周之十一月也水昏正而裁則  
周之十二月正當役民之時也日至而畢則夏之十  
一月而周之正月也謂日至而畢則周之春不宜興  
土功矣經於他事書春夏秋冬而繼書次月則凡書  
時皆指四時之首月如成十七年書冬會伐鄭十一  
月公至十二月日食是也若城築蒐狩之事乃以時  
成通歷三月事畢而言之非獨指首月也詳考經文  
則可見矣湛氏若水曰左氏曰書不時也公羊曰  
以重書也愚謂二說皆是也事孰為重愛民為重愛  
民孰重以時為重卓氏爾康曰莒入向則魯疆場  
須有以備之然夏而用民不憂其力矣灌甫曰案春  
秋城內邑二十三以夏城者七以春城者四其餘皆  
時也不時而城固書時而城亦書何也聖人惜民力  
慎興作懲僭慝耳其畏齊畏晉因邾因莒與大夫自

疆而城各因文以見義  
不在書時與不時也

齊侯使其弟年來聘

此列國來聘之始

左傳

齊侯使夷仲年來聘結艾之盟也

公羊

其稱弟何母弟稱弟母兄稱兄

穀梁

諸侯之尊弟兄不得以屬通其弟云者以其來接於我舉其貴者也

胡傳

兄弟先公之子不稱公子貶也書盟書師而稱兄弟者罪其有寵愛之私書出奔書歸而稱

兄弟者責其薄友恭之義考於事而春秋之情可見矣年者齊僖公母弟也僖公私於同母寵愛異於他弟施及其子猶與適等而襄公絀之遂成篡弑之禍故聖人於年來聘特變文書弟以示貶焉鄭語來盟

黑背帥師皆罪其私也陳光奔楚而稱弟盜殺衛繫而稱兄秦鍼宋辰皆責其薄也仁人於兄弟絕偏繫之私篤友恭之義人倫正而天理存其春秋以訓天下與來世之意也

集說杜氏預曰凡聘皆使卿執圭以相存問孔氏穎達曰聘禮使者執圭以致命東帛加璧以

致享鄭康成云享獻也既聘又獻所以厚恩惠也是執玉帛以相存問也玉人職云瑒圭璋璧琮八寸以

類聘注云八寸者據上公之臣案聘禮圭以聘君璋以聘夫人既行聘之後璧以享君琮以享夫人又鄭

注小行人云使卿大夫類聘降其君瑞一等則侯伯之臣圭璋璧琮皆六寸子男之臣皆四寸又小行人

云圭以馬璋以皮璧以帛琮以錦琥以繡璜以黼鄭注云二王之後享天子圭以馬享后璋以皮其餘諸

侯享天子璧以帛享后琮以錦子男享大國之君琥以繡享大國夫人璜以黼是玉帛之文也楊氏士

勛曰禮小聘曰問使大夫大聘使卿此既名見於經明是卿也案禮聘則執玉以致命執帛以致享故云執玉帛以相存問 啖氏助曰使使致問曰聘主人受之於廟以重禮也 劉氏敞曰其弟云者凡以重書也何重乎齊侯之弟古者年四十而仕五十而爵天下無生而貴者齊侯愛其弟未可爵而爵之亟交於諸侯卒之其子弑齊君而亂齊國是以君子重焉爾 程子曰凡不稱公子而稱弟者或責其失兄弟之義或罪其以弟之愛而寵任之過 左氏公羊傳皆曰年齊僖公之母弟先儒母弟之說蓋緣禮文有立嫡子同母弟之說其曰同母弟蓋謂嫡爾非以同母為加親也若以同母為加親是不知人理近於禽道也天下不明斯義也久矣僖公愛年其子尚禮秩如嫡卒致慕弑之禍書弟見其以弟之愛而寵任之過也 葉氏夢得曰諸侯之邦交歲相問殷相聘周道也書聘不書問略小事也聘大夫之事古者大夫五

十而後爵異姓以名氏見同姓以公子見雖母弟亦  
以公子見年不稱公子非大夫也其弟年云者以母  
弟而任大夫之事以齊侯為愛其弟而易大夫非公  
天下之道也張氏洽曰聘者諸侯遣大夫通好與  
國見於儀禮之篇詳矣然古者諸侯問於天子之事  
則有邦交殷聘之禮自隱公即位以來未嘗朝聘於  
天子以魯推之則諸侯蓋可知矣而齊僖因父之盟  
遽遣使於魯以結好忘君臣之大義植同列之私黨  
故觀年之聘則凡書聘可以例推矣書其弟又著齊  
侯寵愛之私聘魯致女交政鄰國以啟無知篡弒之  
禍也家氏鉉翁曰入春秋為會為盟為過皆非盛  
時之常典惟聘禮近古王制之所得為也然聘不皆  
書惟天王使下聘不以小大皆書大國之使來不皆  
書有故則書列國之使來不悉書有所褒貶則書魯  
大夫之聘列國亦不悉書有故則書陳氏深曰此  
外臣來聘之始終於昭二十一年晉士鞅李氏廉

曰春秋書第十四書兄一齊年鄭語衛黑背皆罪其私陳光秦鍼宋辰衛縶皆罪其薄衛罃佞夫皆可入陳光之列陳招先稱公子而後稱弟亦以陳侯有寵愛之私而致之也獨叔矜稱弟賢之也蓋以其善處兄弟之變者也公羊左氏同母之說程子力辨之而陸氏亦曰聖人之教雖及兄弟之子猶引而進之安有異母即見疎外乎又曰齊之聘魯五年之再來齊僖糾合之時也歸父之來晉襄未定之時也國佐之來齊頃有志於叛晉也慶封之來齊景初立而有志於爭霸也皆出於私情矣然春秋之初齊猶加禮於魯至桓既霸僖七年公子友如齊之後魯使之聘齊者二十二而齊聘僅三至焉亦可以觀世道矣汪氏克寬曰夫子作經雖不逆計其後日之事然於其寵愛之過特書弟以貶焉使後世之讀是經者考無知篡弑之所由始則亦知戒矣諸侯之弟貶則書名不貶則書字故許叔蔡叔蔡季紀季皆賢而稱字且

不言弟

秋公伐邾

此伐邾之始

左傳秋宋及鄭平七月庚申盟於宿公伐邾為宋討也

胡傳奉詞致討曰伐宋人先取邾田故邾人入其郭魯與儀父則元年盟于昧矣邾人何罪可聲特託為詞說以伐之爾經之書伐非主兵者皆有言可執見伐者皆有罪可討也傳曰欲加之罪何患無詞魯為宋討非義甚矣而稱伐邾所謂欲加之罪者也而不知渝昧之盟不待貶而自見矣

集說杜氏預曰公距宋而更與鄭平欲以鄭為援今鄭復與宋盟故懼而伐邾欲以求宋故曰為宋

討長杜氏諤曰詩曰君子屢盟亂是用長言盟適足以亂耳公於元年為蔑之盟至此而伐之其義自



見程子曰擅興甲兵為人而伐之非義之甚也  
張氏洽曰夫和大所以恤小既平宋鄭則邾宋之睚  
眦亦可和矣親此而虐彼苟欲悅宋而忘蔑之盟子  
曰小人比而不周此足以見書為宋討邾之旨矣  
家氏鉉翁曰凡公自將伐國皆有識乎曰當伐而伐  
惟義所在不皆識觀前之盟觀後之伐而知其以背  
盟故識不加貶而義自見者也  
書法大率類此汪氏克寬曰傳例曰聲罪致討曰  
伐此云奉詞者執言以聲其罪其義一也不稱帥師  
者君行師從故君將不言帥師李氏廉曰內兵之  
伐國僅二十而書公伐邾者六書大夫伐邾者八止  
書伐邾者一夫邾在魯之字下而陵弱侵小之兵史  
不絕書如此甚矣魯之失政也季氏本曰邾人與  
鄭伐宋已及二年而魯始為宋伐之者蓋鄭既結成  
於魯故緩於責邾而鄭交猶未固也至是  
復聲邾罪正以見魯之於宋猶未絕耳

冬天王使凡伯來聘

此王聘之始凡杜注凡國伯爵汲郡共縣東南有凡城今凡縣故

城在河南衛輝府輝縣西南二十里

集說

杜氏預曰凡伯周卿士孫氏復曰桓王不能興衰振治統制四海以復文武之業反使凡伯

來聘此桓王之為天子可知也程子曰周禮時聘以結諸侯之好諸侯不修臣職而聘之非王體也

葉氏夢得曰何以書非常也存禮天子之撫邦國者事也春秋何以獨書聘吾考於禮天子之撫邦國者

一歲徧存三歲徧類五歲徧省而無聘問至時聘以結諸侯之好殷類以除邦國之慝問問以喻諸侯之

志則存省不與蓋存類省常也聘問非常也聘與問一事也大曰聘小曰問則問亦聘矣此聘所以獨見

也張氏大亨曰曲禮曰諸侯使人問於諸侯曰聘而大行人稱時聘以結諸侯之好典瑞稱圭璋以類

聘則天子使人問諸侯亦謂之聘王制稱諸侯之於天子比年一小聘三年一大聘則諸侯使人問天子亦謂之聘趙氏鵬飛曰春秋書天王下聘者凡八責諸侯不朝而受天子之聘也隱在位十一年而天王聘魯者二亦何有一介之使如京師以荅天王之勤哉愚案諸家多責天王反聘諸侯為非禮然是時王室微弱諸侯強大孔子作春秋正以扶王室豈有反責天王之理天王亦豈得已而下聘哉呂氏大圭曰春秋之際諸侯之所以事天子者益懈而天子之所以聘於諸侯者何其不憚煩哉十二公之中魯之臣如京師者纔六而王臣來聘者八隱公即位已七年其臣未有一如京師者而天子遣使聘之何哉雖然春秋自宣十年定王使王季子來聘之後魯歷五公周更四王皆無來聘之文蓋文宣以前周固微弱王命猶足以為重文宣以後周室之衰尤甚於前是以春秋之書來聘者八則止於宣公書來求者三

則止於文公書來錫命者三則止於成公來聘則止於宣者自宣以後雖有禮丈不足以結諸侯也來求則止於文者自文以後天王雖求之諸侯亦不與也來錫命則止於成者自成以後雖有爵命不足以寵諸侯也嗚呼是可不為世道慨歎哉汪氏克寬曰凡伯周公之盾詩板與瞻卬皆其所賦蓋世為王臣李氏廉曰春秋書王聘魯七始於此而終於宣十年凡伯南季仍子家父皆不過大夫猶可也宰周公以三公之重王季子以介弟之尊而下聘禮益瀆矣隱僖之得聘猶可也以宰糾而聘桓以季子而聘宣弑矣寵篡

戎伐凡伯于楚丘以歸

此戎患之始楚丘杜注衛地在濟陰城武縣西南今兗州府曹縣

東楚丘亭是也

左傳

初戎朝於周發幣於公卿凡伯弗賓冬王使凡伯來聘還戎伐之於楚丘以歸

穀梁

凡伯者何也天子之大夫也國而曰伐此一人而曰伐何也大天子之命也楚丘衛之邑也以

歸猶愈乎執也

胡傳

國而曰伐此一人而曰伐見其以徒衆也楚丘衛地以歸易詞也于楚丘者罪衛不救王臣之

患以歸者罪凡伯失節不能死於位也周之秩官敵國賓至闕尹以告候人為導司徒具徒司寇詰姦佞人積薪火師監燎其貴國之賓至則以班加一等益虔至於王吏則皆官正蒞事今凡伯承王命以為過賓於衛而我得伐之以歸是蔑先王之官而無君父也

集說

董氏仲舒曰執天子之使與伐國同罪杜氏預曰戎鳴鐘鼓以伐天子之使不書凡伯敗者

單使無衆非戰陣也但言以歸非執也孔氏穎達  
 曰傳例有鐘鼓曰伐此既言伐知其鳴鐘鼓也杜意  
 言以歸者以彼隨己而已非因執之辭故云但言以  
 歸非執也杜必知以歸非執者穀梁傳云以歸猶愈  
 乎執也又昭十三年晉人執季孫意如以歸若以歸  
 是執何須別起執文明直言以歸者非執也陸氏  
 淳曰穀梁曰戎者衛也為其伐天子之使故貶而戎  
 之啖氏曰若衛實伐天子之使改之曰戎是為衛掩  
 惡也如何勸懲乎孫氏復曰言伐用兵也楚丘衛  
 地也以楚丘者責衛不能救難錄以歸者惡凡伯不  
 死位家氏鉉翁曰天子之使我戎得以要而執之天  
 子不命之討方伯連帥復不能為王敵愾春秋書之  
 以見周室微弱卓氏爾康曰伐者一擊一刺以人  
 用戈之義一國言伐鄭人伐衛之類是也一邑亦言  
 伐伐於餘丘是也一家言伐伐單氏  
 之宮是也一人亦言伐此楚丘是也

案穀梁謂以歸猶愈於執杜氏預因為非執其義  
勝公羊多矣古者君行師從卿行旅從諸家謂一人  
而曰伐似亦未合但  
相沿已久今姑仍之

附錄左傳

陳及鄭平十二月陳五父如鄭洎盟壬申  
及鄭伯盟畎如忘洩伯曰五父必不免不

賴盟矣鄭良佐如陳洎盟辛巳及陳侯盟亦知陳之  
將亂也鄭公子忽在王所故陳侯請妻之鄭伯許

之乃  
成昏

丙桓王八年齊僖十六年晉哀三年蔡宣三十五年衛  
宣四年鄭莊二十九年曹桓四十二年陳

桓三十年杞武三十六年宋殤五  
年秦寧公元年楚武二十六年

春秋公衛侯遇于垂

垂杜注衛地濟陰句陽縣東北有  
垂亭今兗州府曹州北句陽店是

其地也

左傳

齊侯將平宋衛有會期宋公以幣請於衛請先相見衛侯許之故遇於犬丘

犬丘杜注垂也地有兩名又曰一地兩名當時並有則兩文互見

穀梁

不期而會曰遇遇者志相得也

集說

程子曰宋忌鄭之深故與鄭卒不成好無諸侯相見之禮故書曰遇高氏閔曰殤公嘗從州

吁之請伐鄭以圖馮矣州吁誅宣公立馮不可不終圖而未知宣公之從否故宋衛遇垂以謀鄭十年入

鄭蓋垂之謀也謀人之國不以禮見而陽若相遇春秋因實書之而貶寓焉陳氏傅良曰特相遇不書

書宋衛將以為參盟也任氏伯雨曰齊侯將平宋衛於鄭衛侯既不敢違齊侯之命又不能釋鄭國之



怨有異志焉故先遇于垂李氏廉曰垂之遇左氏以宋衛有怨於鄭而齊欲平之蓋鄭之怨衛因公孫滑宋之怨鄭因公子馮其說似有據然考之於經後此瓦屋止三國參盟而不及鄭十年入鄭伐戴之師又二國為黨以讎鄭則宋衛此謀蓋有志於從齊黨而無意於釋鄭憾也齊僖亦不過假此以求諸侯耳豈真有平怨之本心歟季氏本曰宋衛本與魯為黨以魯既許鄭平亦將要齊以絕鄭故為此遇而瓦屋之盟議在此矣然以遇禮見者恐泄所謀欲密其迹耳王氏樵曰宋衛素睦而鄭其深讎也齊侯將平宋衛於鄭既有會期矣宋衛乃請先相見而為垂之遇何哉蓋有所謀也况公子馮之在鄭實宋殤之所不能一日忘情者其所謀於衛者不可知必有所要於鄭者其在去馮乎鄭莊不從故宋不果平瓦屋之盟傳稱齊人卒平宋衛於鄭然鄭不會其故可知也

三月鄭伯使宛來歸枋

枋必彭反公穀作邠枋杜注在琅瑯費縣東南今山東兗州

府費縣治故枋城是也

左傳鄭伯請釋泰山之祀而祀周公以泰山之枋易許田三月鄭伯使宛來歸枋不祀泰山也

許田杜注近許之田今開封府許州西南有魯城本許田後置邑寰宇志謂在許昌城南四十里者是也

公羊宛者何鄭之微者也邠者何鄭湯沐之邑也天子有事於泰山諸侯皆從泰山之下諸侯皆有湯沐之邑焉

胡傳鄭伯欲以泰山之枋易許田前此來輸平者以言請之矣未入地也至是來歸枋者其地既輸

矣未易許也成王以周公有大勲勞故特賜之許田  
為朝宿之地宣王以鄭伯母弟懿親故特賜之祔田  
為湯沐之邑祔近於魯許鄭於鄭各以其近者相易  
用是見鄭有無君之心而謂天王不復能巡狩矣用  
是見鄭有無親之心而敢與人以先祖所受之邑矣  
其言我入祔者祔非我有也入者不順之詞義不可  
而強入之也

集說杜氏預曰宛鄭大夫不書氏未賜族又曰成王  
營王城有遷都之志故賜周公許田以為魯朝  
宿之邑後世因而立周公別廟焉鄭桓公周宣王之  
母弟封鄭有助祭泰山湯沐之邑在祔鄭以天子不  
能復巡狩故欲以祔易許田各從本國所近之宜恐  
魯以周公別廟為疑故云已廢泰山之祀而欲為魯  
祀周公孫詞以有求也范氏甯曰王室微弱無復  
方岳之會諸侯驕慢亦廢朝覲之事故鄭以湯沐之

邑易魯朝宿之田也諸侯有大功盛德於王室者京  
師有朝宿之邑泰山有湯沐之邑所以供祭祀也魯  
周公之後鄭宣王母弟若此有賜邑其餘則否許慎  
曰若京師之地皆有朝宿之邑周有千八百國諸侯  
盡京師之地不足以容不合事理孔氏穎達曰內  
卿貶則去族外卿貶則稱人外無去族之理今宛無  
族傳無譏文故知未賜族也傳言鄭釋泰山之祀使  
來歸祊知祊是鄭祀泰山之邑鄭以桓公之故受邑  
泰山之下天子祭泰山必從往助祭使其湯沐焉故  
公羊謂之湯沐之邑既有此邑因立州廟劉炫云言  
祀泰山之邑者謂泰山之旁有此邑內有鄭宗廟  
之祀蓋祀桓武之神孫氏復曰祊鄭邑天子所封  
非魯土地故曰來歸定十年齊人來歸鄆謹龜陰田  
皆此義也先言歸而後言入者鄭不可歸魯不可入  
也鄭人歸之魯人受之其罪一也入者受之之辭  
劉氏敞曰穀梁曰名宛所以貶鄭伯非也魯為大國

猶有未命大夫獨稱其名者况如鄭小國乎程子曰魯有朝宿之邑在王畿之內曰許鄭有朝宿之邑近於魯曰祊時王政不修天子不巡狩魯亦不朝故欲以祊易許田各取其近者故使宛來歸祊始以祊歸魯未言易也朝宿之邑先祖所受於先王豈可相易也鄭來歸而魯受之其罪均也黃氏震曰木訥曰魯初睦於宋宋伐邾鄭齊恐魯助宋故為鄭求魯魯不應之反為宋伐邾故鄭使宛歸魯祊魯得祊始奉社稷以從鄭岷隱曰祊近於魯許田邾於鄭鄭伯利在得許田未敢直取之於魯故先使人歸祊為異日取許田之地魯隱不悟其計受而有之愚案若如木訥是魯要鄭而得祊也若如岷隱是鄭詐魯而歸祊也二說皆是也木訥主前此而言以魯不救鄭也岷隱主後此而言以鄭假許田也要之魯鄭皆懷利以相接者也李氏廉曰祊許之易其謀始於輸平之時然不過借以固魯之好而未敢及許也至是歸祊

以祀周公為詞者蓋隱然致易許之請而隱公猶未  
許其易也鄭莊委分地以合黨而不吝所謂將欲取  
之必固與之者也隱公不察其深謀詭計而溺於一  
眚之入故于防中丘之會不能不徇之而敗宋入許  
陷於大惡而不悟先儒謂鄭莊小人之雄信哉汪  
氏克寬曰王制謂方伯為朝天子皆有湯沐之邑於  
天子之縣內視元士則方伯之外他諸侯無可知然  
定四年祝鮀言衛取有閭之土以共王職取相土之  
東都以會王之東蒐則衛亦有朝宿湯沐之邑矣以  
季氏本曰前年鄭雖納平於魯而交猶未固不足以  
離宋黨故復以枋結之枋田近魯魯所欲得而鄭遠  
控制為難則棄以與魯以利餌魯之術也然度其時  
猶恐魯人不欲當未遽言易許也不然則許田何待  
四年之後始加璧以假乎左氏謂鄭伯請以泰山之  
田易許田蓋因其  
終而逆探鄭志耳

# 庚寅我入祊

公羊

其言入何難也

穀梁

入者內弗受也邠者鄭伯所受命於天子而祭泰山之邑也

集說

杜氏預曰桓元年乃卒易祊田知此入祊未肯受而有之 啖氏助曰公羊云言我者非獨我

也齊亦欲之書我者言魯入耳何闕齊事乎 劉氏故曰未有言我入者其言我入祊何祊非我有也何

言乎祊非我有王者制諸侯之地也有常鄭不得與諸人魯不得取諸人平者義也入祊者利也不正其

以利為義夫苟以利為義者亦必以利廢義君子恥之 葉氏夢得曰歸邠挈鄭伯著鄭罪也入邠挈我

著魯罪也凡內邑歸言取不言入我所有也歸外邑言入不言取非我所有也入逆辭也非我所有外雖

歸之其道猶為逆云爾 高氏閱曰鄆謹龜陰本我之邑歸則有之矣此特書入者以其非我之有不當入也 陳氏傳良曰入未有言我者言我交讎之也 張氏洽曰此固鄭之歸我使吏治其地政而主有之也既不以力得則當如齊人歸我濟西田不必書入祊可也書入者難詞義不當受而據有之也 呂氏大圭曰左氏言以祊易許經文未見以祊易許之事是時鄭結魯非魯結鄭前年來輪平則約之以言今年來歸祊則啗之以利雖然其歸祊也固以覲覲許田矣特以方來結於魯故姑緩之既而桓公篡立於是要其許田始取償於魯左氏以其事比言而謂之易也 汪氏克寬曰鄆謹龜陰書來歸此亦書來歸蓋鄭莊貪魯人之易許而歸祊齊景服聖人之德化而歸鄆謹龜陰雖其義利不侔而歸出於中心之誠非勉強使之歸也故皆書曰來歸美惡不嫌同辭然此年書入以示其不順則非鄆謹龜陰之比矣



案公羊以日為難穀梁以日為惡者也二說皆以日為例朱子謂解春秋者專以日月為褒貶穿鑿得全無義理故刪之

附錄左傳夏號公忌父始作卿士於周四月甲辰鄭公子忽如陳逆婦媯辛亥以媯氏歸甲

寅入於鄭陳鍼子送女先配而後祖鍼子曰是不為夫婦誣其祖矣非禮也何以能育

## 夏六月己亥蔡侯考父卒

集說孫氏覺曰穀梁云日卒正也孔子因舊史作春秋詳略不得加之也此云日為正則無日而非

正者孔子如何書之也陳氏深曰春秋於諸侯之卒悉以名書亦所以謹終辨實使邦君之名謚可考而不至於混淆耳諸侯告終則必稱嗣以赴自其告先君之終則已紀錄於列國之史矣非特同盟朝會

聘告之  
有證也

# 辛亥宿男卒

穀梁宿微  
國也

胡傳諸侯薨以名赴而自別於大上禮也古者死而  
不謚不以名為諱周人以謚易名於是乎有諱  
禮故君薨赴於他國則曰寡君不祿敢告執事春秋  
之時遵用此禮凡赴者皆不以名矣赴不以名而書  
其名者與魯通也已通而不名者舊史失之耳未通  
而名者有所證矣故傳此義者記於禮篇曰諸侯不  
生名夫生則不名死則名之別於大  
上示君臣尊卑之等蓋禮之中也

集說孫氏覺曰此與滕侯不名同例家氏鉉翁曰  
不名史失之也不葬魯微之而不會也俞氏

皋曰同盟故來赴不名闕文也元年及宋人盟而穀梁以為未能同盟誤矣汪氏克寬曰宿男元年同盟杞與魯結昏而成公卒不書名滕同伐秦而成十六年滕子卒不名皆史失之季氏本曰諸侯死則稱名乃策書常體聖人亦因其舊而已矣豈有所增益於其間哉蓋諸侯之衆死而不名則其世無所別矣故凡不書名者皆闕文也

案宿男不名諸儒皆以為史失之是也胡傳謂赴不以名而經書其名是聖人筆之恐無可據

秋七月庚午宋公齊侯衛侯盟于瓦屋

此參盟之始瓦屋杜注周地

今開封府洧川縣南二十里瓦屋里是其地

左傳齊人卒平宋衛于鄭秋會于溫盟于瓦屋以釋東門之役

穀梁諸侯之參盟於是始

胡傳周官設司盟掌盟載之法凡邦國有疑則請盟於會同聽命於天子亦聖人待衰世之意耳德又下衰諸侯放恣其屢盟也不待會同其私約也不由天子口血未乾而渝盟者有矣其未至於交質子猶有不信者焉春秋謹參盟善胥命美蕭魚之會以信待人而不疑也蓋有志於天下為公之世凡此類亦變周制矣

集說杜氏預曰齊侯尊宋使主會故宋公序齊上范氏甯曰宋序齊上王爵也陸氏淳曰左氏曰以釋東門之役禮也趙氏曰諸侯結盟本非正道有何合禮孫氏覺曰三國之盟係諸侯之安危故春秋書之穀梁曰參盟於是始故謹而日之案春秋褒貶之法本無義例罪同同誅惡同同罰不以終始

為輕重也。謂之謹始則非也。程子曰：宋為主也，盟與鄭絕也。許氏翰曰：春秋之初，宋公先齊序爵也。其後乃以國之大小為次，惟主會者為之矣。陳氏傳良曰：諸侯初參盟也。傳曰：諸侯之參盟於是始有參盟。然後有主盟矣。春秋之初，宋魯衛陳蔡一黨也。齊鄭一黨也。鄭有志於叛王，而合諸侯於是。輪平於魯，齊亦為艾之盟，以平魯為瓦屋之盟，以平宋衛。所謂成三國也。東諸侯之交盛矣。張氏洽曰：春秋之初，皆離會之盟。至此則三君共要質於神，以示明信。而明年會防之後，伐宋取邑，視今日盟誓之言，不復顧忌。春秋於瓦屋之盟，列數三君，而又書曰：以謹之。所以傷世變之甚也。家氏鉉翁曰：春秋初年，惟兩國為盟。今而參盟，宋為首責在宋也。前年宋衛陳蔡合兵以伐鄭，於是始有四國之伐。是時東遷之始，諸侯猶有未叛王者。而宋連四國之兵，盟三國之侯，不以王命行事。春秋於參盟會伐，皆以宋為首，正其無

王之戮也港氏若水曰紀參盟也古者天下為公會同之禮制於天子無上命而私盟無道之甚者也  
然而彼善於此則有之參盟之謂也故書而紀之日  
與不日史記有詳略聖人遂因之而不削耳王氏  
懋曰參盟非始於是也隱元年及宋人盟于宿已為  
參盟之端然宿小國而內稱及外稱人皆微者猶不  
足紀故穀梁發義於此張氏溥曰春秋齊衛遇于垂  
齊平宋衛於鄭也秋宋齊衛盟于瓦屋齊卒平宋衛  
於鄭也此左氏之文也然以經考之遇垂而鄭不聞  
盟瓦屋而鄭不與鄭豈受平者哉侵牧之役衛鄭怨  
淺長葛之役宋鄭怨深公子馮在鄭宋殤公未嘗一  
日忘也宋亟欲去馮而合鄭鄭莊公必不從是故瓦  
屋之盟絕鄭  
非平鄭也

八月葬蔡宣公

集說

杜氏預曰三月而葬速陸氏淳曰葬時舉謚而不須重言名史體自當然程子曰速也諸

侯五月而葬不及期簡也張氏洽曰蔡自共侯至桓侯書於史記者其君皆稱侯今考父史記亦書曰

宣侯而春秋以公書所以著臣子之私謚其尊之同於諸侯也湛氏若水曰書葬蔡宣公赴告鄰國之

大事諸侯有會葬之禮焉故書之然而同盟之義不及時之禮具可見矣

附錄左傳

八月丙戌鄭伯以齊人朝王禮也

九月辛卯公及莒人盟于浮來

浮公穀作包此好莒之始亦魯君特會外大

夫之始浮來杜注紀邑東莞縣北有邳鄉邳鄉西有公來山號邳來間今莒州西二十里有浮來

左傳

以成紀好也

公羊

稱人則從不疑也

胡傳

禮且明非大夫之罪也易曰謙尊而光卑而不

可踰隱公可謂謙矣何以譏之為失禮曰謙亨君子

以裒多益寡稱物平施屈千乘之尊下與小國之大

夫盟豈稱物平施之謂乎  
太卑而可踰非謙德矣

集說  
禮趙氏匡曰莒小國若不書公則嫌乎非公也屈

曰凡公獨與外大夫盟例不書公及齊高奚晉處父

盟是也所以罪齊晉也此特書公者莒小國也非大

夫敢盟公是公自欲與之盟耳所以譏公之失禮且

明非大夫之罪也孫氏復曰凡公與外大夫盟內

斥言公外大夫稱人惡在公也此年公及莒人盟于

浮來成二年公及楚人秦人宋人陳人衛人鄭人齊



人曹人邾人薛人鄆人盟于蜀是也內不言公外書大夫名氏惡在大夫也莊十有二年及齊高傒盟于防文二年及晉處父盟是也劉氏敞曰莒人微者也公曷為與乎莒之微者盟公欲之也何用見公欲之也公與大夫盟沒公以其不沒公知其欲之也非公之輕南面而下與大夫盟也程子曰邾國之交講信修睦可也安用盟為公屈已與臣盟義非安也家氏鉉翁曰凡公與強國之大夫為盟不書公及諱強國之以無道加於公也與小國之大夫為盟則不諱公及以公自欲與之為盟也魯莒有未平之怨前此紀人為之平之而魯莒之好猶未合也今隱公欲降心以消二國之患而莒之君卒不至以望國之君而盟小國之臣謙而不中禮者也李氏康曰春秋書公及人盟二浮來及蜀是也穀梁曰可言公及人不可言公及大夫然則公及齊大夫盟薩何得云不可杜氏例以為微者不嫌敵公侯故直稱公然高

後處父大國貴卿猶以伉尊為諱今乃直書不諱乎  
趙子曰莒小國若不書公則嫌乎非公此說是矣故  
胡氏從之若蜀之盟則上書公子下書楚人其賤明  
甚不可與此例論也陳氏際泰曰春秋未有先與  
小國大夫盟者自魯隱昉也梁通  
刺天下之大夫而浮來已見其端

# 螟

集說程子曰為災也民以食為命故有災必書高  
氏閏曰書螟者三隱二莊一僉十有一桓一餘  
皆僉公之後螟食苗心僉無所不食其為災螟輕而  
僉重春秋之初災之輕者亦書之及其久也輕者不  
勝書書其重者耳不然豈莊  
公之後二百年皆無螟耶

## 附錄左傳

冬齊侯使來告成三國公使眾仲對曰君  
釋三國之圖以鳩其民君之惠也寡君聞

命矣敢不承  
受君之明德

冬十有二月無駭卒

駭穀作孩

左傳羽父請謚與族公問族於衆仲衆仲對曰天子建德因生以賜姓胙之土而命之氏諸侯以字

為謚因以為族官有世功則有官  
族邑亦如之公命以字為展氏

胡傳無駭書名未賜族也諸侯之子為大夫則稱公孫公孫之子與異子其孫也而為大夫則稱公孫公孫之子與異

姓之臣未賜族而身為大夫則稱名無駭挾之類是也  
已賜族而使之世為大夫則稱族如仲孫叔孫季

孫之類是也古者置卿必求賢德不以世官春秋之初  
猶為近古故無駭與挾皆書名耳其後官人以世

無不賜之族或以字或以謚或以官或以邑而先王之  
禮亡矣至於三家專魯六卿分晉諸侯失國出奔

者相繼職此由也案禮天子冢內諸侯世其祿而不嗣然則諸侯所置大夫嗣其位而不易豈禮也哉觀春秋所書而是非之迹著矣治亂之效明矣

集說而巳孫氏復曰不氏未命也程子曰未賜族書名張氏洽曰春秋無駭挾之卒與季友仲

遂之卒實因卿大夫之告終以謹世變所以著無駭挾之未賜族不為薄而季友仲遂之恩實過於厚過厚若隆於恩而先王之禮毫釐之過則生亂啟釁常必由之學者不可以不考也家氏鉉翁曰因生賜

姓昨之土而命之氏說者謂若舜由媯汭故陳為媯姓而命氏則曰陳諸侯位卑不得賜姓故其臣因氏

其王父字或使即先人之謚以為族如衛齊惡宋戴惡之類是也或取其舊官舊邑之稱以為之族舊官

如晉士氏舊邑如韓趙魏之類是也又曰諸侯之子稱公子公孫之子稱公孫公孫之子不得復稱公曾

孫無駭輩以名行及其死則賜之族以王父字為族是也未死賜族者僅一二見公子公孫於身無賜族之理經書季友叔肸仲遂者皆是以字配名其傳云立叔孫氏臧僖伯臧哀伯叔孫戴伯之徒皆傳家據後書之耳宋督戴公之孫未死而賜族生立華氏彼弑君懼討求為此非例也其公之曾孫以外爰及異姓有新升為卿君賜之族以此卿之字即為此族者亦有雖為卿而竟不賜族者挾柔溺之後無聞者是也春秋初年周制猶存故有未賜族之大夫其後大夫世其官無不賜族而周制幾於掃地矣汪氏克寬曰穀梁謂隱不爵命大夫然傳稱司空無駭而又帥師出境則為大夫明矣特未賜族耳李氏廉曰公穀以為罪無駭入極而貶之又以為隱不成為君故不爵大夫皆無據

丁桓王九年

齊僖十七年晉哀四年衛宣五年蔡桓侯封人元年鄭莊三十年曹桓四十二年陳

桓三十一年杞武三十七年宋殤  
六年秦寧二年楚武二十七年

# 春天王使南季來聘

穀梁

南氏姓也季字也聘問也聘諸侯非正也

胡傳

案周禮行人王者待諸侯有時聘以結好間問以諭志而穀梁子何以獨言聘諸侯非正也古

者諸侯於天子比年一小聘三年一大聘五年一朝天子於諸侯不可以若是忽故亦有聘問之禮焉隱公即位九年於此而史策不書遣使如周則是未嘗聘也亦不書公如京師則是未嘗朝也一不朝則貶其爵再不朝則削其地如隱公者貶爵削地可也刑則不舉遣使聘焉其斯以為不正乎經書公如京師則天朝於王所者二卿大夫如京師者五舉魯一國則天下諸侯怠慢不臣可知矣書天王來聘者七錫

命者三歸服者一贈葬者四則問於他邦及齊晉秦楚之大國又可知矣王之不王如此征伐安得不自諸侯出乎諸侯之不臣如此政事安得不自大夫出乎其原皆自天王失威福之柄也春秋於此蓋有不得已焉爾矣

集說

范氏甯曰周禮天子時聘以結諸侯之好殷纘以除邦國之慝間問以諭諸侯之志歸服以交

諸侯之福賀慶以贊諸侯之喜致禮以補諸侯之災劉氏敞曰南者何氏也季者何字也何為字下大

夫也天子之下大夫四命聘者何問也諸侯時朝乎天子以致敬也天子時聘乎諸侯以致愛也程子

曰周禮大行人時聘以結諸侯之好王法之行時加聘問以懷撫諸侯乃常禮也春秋之時諸侯不修臣職朝覲之禮廢絕王法所當治也不能正典刑而反聘之又不可見答失道甚矣葉氏夢得曰聘或以卿

或以知聘大夫以卿聘者大聘也。以大夫聘者小聘也。何  
建也。然有曰：大夫來使無罪，則饗。蓋有大夫而為使  
者矣。而禮諸侯之邦交五年一次聘，三年一小聘。先  
儒謂大聘用卿，小聘用大夫。此諸侯之禮也。春秋書  
王聘言尊者如宰，周公幼者如王季子。仍叔之子固  
異文而有書卿以邑爵見。如凡伯、渠伯者，有書大夫  
以氏字見。如南季、家父者，以諸侯之禮推之，茲非大  
小之辨歟。大聘聘也，小聘問也。聘有享獻，及夫人主  
人筵几，有私面升而郊勞至問，則略之。是所以為大  
小之辯者。此使所以亦不得同也。朱子曰：諸侯不  
朝於周，而周反下聘於列國，是甚道理。張氏洽曰：  
隱公十年之間，率咥凡伯、南季三至魯庭，以魯為周  
公之冑，而欲親之也。公不明尊王之義，而朝聘之禮  
不行於王室。春秋詳王使之來，魯則知隱公之罪大  
矣。趙氏鵬飛曰：周制一不朝，則貶其爵。再不朝，則



削其地且以五年一朝則隱公及是九年當再朝矣  
再不朝而天王一貶一求二聘焉聖人著天王遣使  
之節所以責魯不再朝之罪也汪氏克寬曰隱公  
之立既不稟命於周宰咺祭伯接踵魯庭而不類見  
於平王武氏子來求聘又不奔喪會葬及桓王即位  
又不入覲而奄然受王臣之兩聘接滕薛之旅朝終  
其世不遣一介行李造於京師苟曰攝而不君則若  
何比歲出會諸侯耶春秋錄王臣之聘惟隱桓之世  
最數隱不克終桓負大惡不善之積蓋有由矣

宋胡傳本程子之說以為天王失威福之柄  
張氏洽主罪魯似當兼用二說經意乃足

### 三月癸酉大雨震電庚辰大雨雪

雨于反

左傳九年春王三月癸酉大雨霖以震書始也庚辰  
大雨雪亦如之書時失也凡雨自三日以往為

霖平地尺  
為大雪

公羊 三月癸酉大雨震電何以書記異也何異爾不  
時也庚辰大雨雪何以書記異也何異爾叙甚  
也

穀梁 三月癸酉大雨震電震雷也電霆也庚辰大雨  
雪志疏數也八日之間再有大變陰陽錯行故  
謹而日之也  
雨月志正也

胡傳 震電者陽精之發雨雪者陰氣之凝周三月夏  
之正月也雷未可以出電未可以見而大震電  
此陽失節也雷已出電已見則雪不當復降而大雨  
雪此陰氣縱也春秋災異必書雖不言其事應而事  
應具存惟明於天人相感之際響  
應之理則見聖人所書之意矣

集說

何氏休曰震雷電陽氣也有聲曰雷無聲曰電周之三月雨當冰雪雜下雷當聞於地中電未

可見而大雨震電此陽氣大失其節日者一日之中也凡災異一日者日歷日者月歷月者時歷時者加自文為異始怒也始怒甚猶大甚也師說以為平地七尺雪者盛陰之氣也杜氏預曰三月今正月又曰夏之正月微陽始出未可震電既震電又不當大雨雪故皆為時失范氏寔曰劉向云雷未可以出電未可以見雷電既已出見則雪不當復降皆失節也雷電陽也雨雪陰也雷出非其時者是陽不能閉陰陰氣縱逸而將為害也孔氏穎達曰說文云震劈歷震物者電陰陽激曜也河圖云陰陽相薄為雷陰激陽為電然則震是雷之劈歷電是雷光僂十五年震夷伯之廟是劈歷破之雷之甚者為震故何休云震雷也說文云雨水從雲下也然則雨者天上下水之名既見雨從天下自上下者因即以雨言之

故下雪稱雨雪也 劉氏敞曰傳曰大雨霖以震凡雨自三日以往為霖杜氏云此傳解經書霖而經無霖字經誤也非也經有電無霖傳有霖無電傳不解經經反誤哉然丘明不宜革電為霖蓋其所據簡策錯誤不能決之於經直因循舊記而已杜氏遂專謂經誤黨於左氏至如此不已惑乎 程子曰陰陽運動有常而無忒凡失其度皆人為感之也故春秋災異必書漢儒傳其說而不達其理故所言多妄三月大雨震電不時災也大史公曰孔子論六經記異而說氏傳良曰記異也大史公曰孔子論六經記異而說不書得春秋之指矣 俞氏皋曰朱子曰陰氣凝聚在內者不得出則奮擊而為雷陽氣伏陰之內不得出則爆開而為電陰陽蒸鬱而成雨陽和陰則為雪也 汪氏克寬曰或謂春秋用夏正故建辰之月雨雪為異苟實建辰之月則震電不必書矣

挾卒

挾公穀  
作俠

公羊

俠者何吾大夫  
之未命者也

穀梁

俠者所  
使也

集說

杜氏預曰挾魯大夫未賜族 劉氏敞曰挾者  
何吾大夫也曷為或卒或不卒正大夫也則卒

之非正大夫也則不卒之公子翬如齊逆女亦正大  
夫也何以不卒貶曷為貶與弒公也 齊氏履謙曰

案魯世卿之族其嗣不見於經者三人然益師之後  
傳有衆仲無駭之後傳有展禽展喜展瑕展莊叔展

王父惟挾之後無人或所氏之世至挾而絕或其子  
孫更微無事可見或當是時國之紀綱猶在於君盟

會侵伐多親制之故雖有世卿而名氏不登於史冊  
春秋之作亦據其所見者耳 卓氏爾康曰公羊氏

吾大夫之未命者也是也不賜族者春秋之始尚朴也穀梁氏隱不爵大夫不成為君也非也郝氏敬

曰謂挾不書族隱攝不主爵不賜也夫隱攝政十有一年矣盟會侵伐不絕書何以獨不主爵無駭之賜

展氏非  
隱賜歟

# 夏城郎

左傳書不  
時也

胡傳城者禦暴保民之所而城有制役有時大都不過三國之一邑無百雉之城制也魯嘗城費城

邱其後復墮焉則越禮而非制矣凡土功龍見而戒事火見而致用水昏正而裁日至而畢時也隱公城

中丘城郎而皆以夏則妨農務而非時矣城不踰制役不違時又當分財用平板榦稱畚築程土物議速

通略基址揣厚薄仞溝洫具錐糧度有司量功命日  
不愆於素然後為之可也况失其時制妄興大作無  
愛養斯民之意者  
其罪之輕重見矣

集說許氏翰曰七年城中丘而後伐邾今城郎而後  
伐宋于時動衆恃城保國亦已末矣高氏閔  
曰魯自受祊之後將為鄭伐宋又恐他國之議其後  
者故城郎以備之趙氏鵬飛曰備宋也郎逼於宋  
魯將北會齊鄭伐宋疑宋為批亢擣虛之策故城以  
備之尚何暇顧天時之正否民力之豐凶耶李氏  
廉曰郎魯近邑隱之元年費伯已城之矣至此年復  
城而桓十年三國之伐來戰於此莊八年陳蔡之俟  
亦次於此十年齊宋以兵窺魯又宿師於此則郎豈  
非魯之要地乎厥後築臺于郎築郎囿想皆在此始  
也猶有警懼之心終  
也遂為遊觀之地矣

秋七月

穀梁

無事焉何以書不遺時也

集說

范氏甯曰四時不具不成年也

冬公會齊侯于防

防公作郕防杜注魯地在琅瑯華縣東南今兗州府費縣東北六十里

有華城即華縣也

左傳

宋公不王鄭伯為王左卿士以王命討之伐宋宋以入郕之役怨公不告命公怒絕宋使秋鄭

人以王命來告伐宋冬公會齊侯于防謀伐宋也

穀梁

會者外為主焉爾



胡傳

周官行人曰時會以發四方之禁此謂非時而合諸侯以禁止天下之不義也列國何為此

名凡書會皆譏也謂非王事相會聚爾左傳稱宋公不王鄭伯以王命討之使來告命會于防謀伐宋也于中丘為師期也亦謂之非王事可乎曰以王命討宋而聽征討之禁於王都雖召陵之舉不及是矣始則私相會為謀於防中則私相盟為師期於鄧終則乘敗人而深為利以取二邑歸諸已奉王命討不庭者果如是乎經之書會書伐而不異其文以此

集說

高氏閌曰齊背瓦屋之盟與公連謀為鄭伐宋也隱公得利則合鄭既歸枋與齊鄭併力齊之

強大可以為助可以伐人故諸侯爭與之盟宋既與之謀鄭而魯鄭又與之謀宋也張氏洽曰魯隱自六年受輸平八年入枋志於昵鄭而讎宋故外為平宋之形鄭復以不王之罪加於宋則興兵有名而其

義亦可以招齊此會防之謀所以為明年伐宋之地也左氏見其名而不察其實故書之如此殊不知鄭莊特假此以誑齊魯耳觀繻葛之役則宋殤之不正豈至如鄭莊之甚乎呂氏大圭曰凡書會皆非正也彼善於此惡有重輕則各存乎其事焉家氏鉉翁曰左氏曰鄭人以王命來告伐宋冬會于防謀伐宋也左氏雜記所聞而後儒多議其誣此類是也魯昭於歸訪之利齊背瓦屋之盟連兵而伐與國內揣有愧故相與假王命非王意也春秋書公會齊侯于防誅始謀也其後霸主挾天子以令諸侯實昉於此問地尅期而往朝於天子耳春秋書會九十二皆非以王事而相會也公會者四十九夫人會者四大夫會者二十三外會者十三外會公者三凡書會皆譏也惟襄十一年會于蕭魚晉悼公以不戰而屈楚推至誠以待鄭禮囚禁暴偃兵息民故書會伐而又書

會為一經之時筆可謂彼善於此者矣王氏樵曰是時未有霸也已為霸之漸前此惟兩君相會至此而諸侯參會矣前此惟敵國相攻至此而連諸侯伐宋矣自參盟而有主盟自連諸侯而摟諸侯以伐諸侯故五霸三王之罪人也而放恣之諸侯又五霸之罪人也此春秋之大指也

附錄左傳

北戎侵鄭鄭伯禦之患戎師曰彼徒我車懼其侵軼我也公子突曰使勇而無剛者

嘗寇而速去之君為三覆以待之戎輕而不整貪而無親勝不相讓敗不相救先者見獲必務進進而遇覆必速奔後者不救則無繼矣乃可以遲從之戎人之前遇覆者奔祝聃逐之衷戎師前後擊之盡殪戎

師大奔十二月甲寅鄭人大敗戎師

戊桓王十年

齊僖十八年晉哀五年衛宣六年蔡桓二年鄭莊三十一年曹桓四十四年陳桓三

十二年杞武三十八年宋殤七年秦寧三年楚武二十八年

春王二月公會齊侯鄭伯于中丘

左傳

十年春王正月公會齊侯鄭伯于中丘癸丑盟於鄆為師期

鄆杜注魯地路史黃帝臣鄆伯溫國當在今兗州府境

集說

杜氏預曰傳言正月會癸丑盟釋例推經傳日月癸丑是正月二十六日知經二月誤又曰尋

九年會于防謀伐宋也公既會而盟盟不書非後也蓋公還告會而不告盟程子曰為師期也陳氏

傅良曰鄭伯受命伐宋爾何為乎中丘之會鄭有志於叛王而合諸侯故無王命而私會齊魯齊魯亦無王命而私會於鄭而後諸侯之師始衡行於天下家氏鉉翁曰冬甫會齊于防春又會于中丘惟利是

趙春秋聯書之所以貶也汪氏克寬曰防之會魯始與齊謀伐宋之舉至中丘之會復偕鄭合謀而決出師之期經備錄之著伐宋之兵所由合也此乃直書而義自見

# 夏鞏帥師會齊人鄭人伐宋

左傳夏五月羽父先會齊侯鄭伯伐宋

胡傳鞏不氏先期也始而會宋以伐鄭固請而行今而會鄭以伐宋先期而往不待鍾巫之變知其有無君之心矣夫亂臣賊子積其強惡非一朝一夕之故及權勢已成威行中外雖欲制之其將能乎故去其公子以戒兵柄下移制之於未亂也

集說孔氏穎達曰傳稱羽父先會齊侯鄭伯是不待公命也貪會二國之君自求其名疾其專進故

賤去公子案四年鞏固請而行故賤去其氏此無固請之文亦賤之者鞏於四年傳稱固請明此先會亦固請也傳於四年其文已詳故於此而略耳程子曰三國先遣將致伐齊鄭稱人非卿也

六月壬戌公敗宋師于管

敗必邁反管古頑反管杜注宋地

左傳

六月戊申公會齊侯鄭伯於老桃壬戌公敗宋師于管

老桃杜注宋地戰國策高誘注曰任城有桃聚今山東兗州府濟寧城北有桃鄉城

穀梁

內不言戰舉其大者也

集說

杜氏預曰齊鄭後期故公獨敗宋師孔氏穎達曰案傳公會齊侯鄭伯於老桃然後公敗宋

師則知老桃之會謀與宋戰彼與公謀戰而公獨敗宋師知齊鄭後期也孫氏復曰公與鞏衆悉力共

疾於宋又決日而取二邑故君臣並錄以疾之  
氏覺曰左氏之例曰未陳而薄之曰敗某師春秋內  
敗外者凡八豈魯專能未陳而薄人乎程子曰不  
言戰而言敗敗者為主彼與戰而此敗之也陳氏  
傳良曰外書伐不書敗伐而敗焉不足書也必交戰  
也而後言戰言敗績惟內師悉書之勝焉則書敗某  
師敗則但書戰必會他國之君大夫也而後從外辭  
言戰言敗績程氏端學曰不言齊鄭獨魯敗之也  
諸侯擅興師伐人之國而敗其師  
雖僥倖於一時王法所當誅也

辛未取郕辛巳取防

郕古報反部杜注濟陰城武縣  
有郕城今在兗州府城武縣東南

八十里有西防城今在兗州府金鄉縣西南

左傳 庚午鄭師入郕辛未歸於我  
庚辰鄭師入防辛巳歸於我

胡傳

內大惡其辭婉小惡直書而不隱夫諸侯分邑非其有而取之盜也曷不隱乎於取之中猶有

重焉

者若成公取邾襄公取邾昭公取邾皆覆人之邦而絕其嗣亦書曰取所謂猶有重焉者此也故取

郕取防

直書而不隱也其不言戰而言敗敗之者為主彼與戰而此敗之也皆陳曰戰詐戰曰敗

為

集說

陸氏淳曰左氏曰君子謂鄭莊公於是乎可謂正矣以王命討不庭不貪其土以勞王爵正之

體也

趙子曰諸侯專取他國之邑而以與人罪之大者而云合正何其妄乎孫氏覺曰公羊謂取邑不

日此

日者一月再取甚之也案取邑不在書日若無日則是同日取之此但記實爾凡取邑皆有罪何論

一月

再取乎假如異月再取則為無罪乎又曰內大惡不書小惡書夫人姜氏會齊侯于禚亦大惡不可

謂不

書也穀梁曰不正其乘人之敗而深為利取二邑故謹而日之案經書敗人師而取二邑自己不正



何須日以謹之哉程子  
曰取二邑而有之盜也

# 秋宋人衛人入鄭

集說

程子曰鄭勞民以務外而不知守其國故二國  
入之高氏閔曰宋又連衛以報鄭鄭幸管之

敗而不備故師還及郊宋衛已乘其虛而入之矣春  
秋無義戰未有奇譎輕疾如宋衛之入鄭者陳氏  
深曰宋量力未能報齊魯故偕衛先報鄭鄭不暇禦  
之故入之易也程氏端學曰鄭結齊魯以伐宋宋  
結衛以入鄭報復不已由乎王政不綱諸侯放肆聖  
人所以傷世變也湛氏若水曰書宋人衛人入鄭  
著擅興反覆相攻之罪也夏鄭與齊魯伐宋秋宋與  
衛人伐鄭干戈相尋王法不禁觀其所書聖人之志  
可見矣

宋人蔡人衛人伐戴鄭伯伐取之

戴公穀作載  
注戴國陳留外黃縣

東南有戴城今河南歸德府考城縣東南五里考城故城是也

左傳

秋七月庚寅鄭師入郊猶在郊宋人衛人入鄭蔡人從之伐戴八月壬戌鄭伯圍戴癸亥克之

取三師焉宋衛既入鄭而以伐戴召蔡人蔡人怒故不和而敗

集說

杜氏預曰三國伐戴鄭伯因其不和伐而取之書伐用師徒也書取克之易也孔氏穎達曰

案傳

例克邑不用師徒曰取然則取者據克邑之易其克得師衆而易者亦曰取是以莊十一年注云威

力兼備若羅網所掩覆一軍皆見禽制若非前敵之易何能覆而取之然則凡言取者皆易辭沈氏亦云

今日圓明日取故知易也公羊傳云其言伐取之何易也是杜所用之義程子曰宋人衛人入鄭蔡人

從之伐戴鄭伯圍戴克之取三師焉戴鄭所與也故  
三國伐之鄭戴合攻取三國之衆其殘民人甚矣  
高氏閔曰宋既連兵入鄭又乘勝召蔡人伐戴戴鄭  
所與之微國伐之所以報鄭也鄭又伺三國之便伐  
而取之盡得三師之輜重焉是宋衛雖入鄭不能為  
鄭之弱也趙氏鵬飛曰春秋無義戰聖人於不義  
之中必誅其兵首宋鄭交惡久矣兵端則起於宋隱  
四年宋人助州吁為虐以稱兵於鄭秋又伐之故五  
年連郕兵伐宋宋繼取長葛於是有前日之伐取郕  
取防以報長葛之失則勝負相當得失相償宋可以  
已矣今鄭師還未及國而宋以兵入之又連蔡衛以  
伐其附庸亦已酷矣鄭伯出兵乘之戴鬪其前鄭扼  
其後一舉而取三師焉三國之敗非不幸也或者疑  
鄭之孤兵不能取三國之衆更以為鄭伯乘危取戴  
戴鄭之附庸既屬於鄭矣何必取哉何以知戴之為  
鄭附庸戴今之外黃是也居鄭北鄙三國入鄭不克

故移兵以戕其附庸不然三國伐戴何損於鄭哉以是知其非取戴也取三師矣家氏鉉翁曰春秋人宋而未嘗與鄭也書鄭伯目其人也吳氏澂曰取猶哀九年宋皇瑗取鄭師于雍丘哀十三年鄭罕達取宋師于岳之類謂敗其兵而悉俘其衆也李氏廉曰程子以為鄭戴合攻盡取三國之衆此說為當胡氏以為一舉而兼四國恐過汪氏克寬曰公穀皆謂鄭因三國之力而取戴然鄭方與宋鬪未可資其力以取戴宋衛方入鄭而連蔡以伐鄭之與國必不肯資鄭之力而使之取戴也賀氏仲軾曰公穀皆以為取戴譏鄭伯因人之力非也宋衛入鄭而蔡從之鄭人之忿在三國而不在戴故因其在戴而伐取之左傳曰鄭伯圍戴克之取三師焉是也胡氏謂鄭一舉而兼四國亦非也

案公穀謂鄭因三國之力以取戴胡傳謂四國已鬪鄭乘其敝一舉而兼取之俱於情事似未盡合獨程

子用左氏取三師之說以爲鄭戴合攻盡取三國之衆而趙氏鵬飛李氏廉汪氏克寬互相發明於經旨近焉

附錄左傳九月戊寅鄭伯入宋

冬十月壬午齊人鄭人入邾邾公作盛

左傳蔡人衛人鄭人入邾人不會王命冬齊人鄭人入邾討違王命也

穀梁入者內弗受也

胡傳左氏傳云齊鄭入邾討違王命也若討違王命則不書入矣入者不順之詞也苟以爲難詞則

齊鄭大國於邾何難哉

集說何氏休曰盛魯同姓於隱篇再見入者明當憂  
錄之程子曰討不會伐宋也宋以公子馮在

鄭故二國交惡左氏傳云宋公不王鄭伯以王命討  
之於春秋不見其爲王討也王臣不行王師不出矯  
假以逞私忿耳高氏閔曰戴鄭所與也而三國伐  
之郕衛所與也而齊鄭入之是效尤也薛氏季宣  
曰於此郕再入矣諸侯專兵而小國無以措手足  
家氏鉉翁曰不書伐而書入掩其不備而入之也  
吳氏澂曰自五年衛入郕之後郕遂服屬於衛故爲  
衛之與李氏廉曰鄭莊假王命之事自隱之元年  
以王師號師伐衛則猶爲卿士也至三年有交質之  
惡周人界號公政矣六年鄭始朝周而不見禮八年  
襄號公忌父始作卿士於周而鄭又以齊朝王九年  
然後有宋公不王之師而傳曰鄭伯爲王左卿士豈  
非兩朝之後周復用之而鄭所以周旋王室不過爲  
矯假報復之私初非有夾輔之誠也十一年入許傳

又曰君謂許不共亦假飾之詞也卒之敗宋入郕入  
許納馮之後志得意滿而有繻葛之戰矣故諸傳惟  
程氏得之左氏得其事而不究其情是爲鄭伯之所  
欺也汪氏克寬曰入春秋之始兵爭假擾未有若  
是年之尤甚者也夏而三國伐宋秋而宋衛入鄭又  
偕蔡伐戴鄭莊又圍戴取三國之師且偕齊入郕戰  
國之殺人盈城兆於此矣此春秋之所以作也卓  
氏爾康曰齊所欲者郕也鄭所欲者許也鄭黨齊以  
入郕齊黨鄭以入許交相倚恃以侵小自  
肥今冬之入郕與明秋之入許同一貪兵

己恒王  
己八年

十有一年

齊僖十九年晉哀六年衛宣七年蔡  
桓三年鄭莊三十二年曹桓四十五

年陳桓三十三年杞武三十九年宋  
殤八年秦寧四年楚武二十九年

春滕侯薛侯來朝

此諸侯朝魯之始亦旅見之始薛  
杜注魯國薛縣今薛城在山東兗州

府滕縣南四十里孔疏譜云薛任姓黃帝之苗裔奚仲封爲薛侯仲虺居薛以爲湯左相武王復以其胄爲薛侯小國無記世不可知亦不知爲誰所滅

左傳春滕侯薛侯來朝爭長薛侯曰我先封滕侯曰我周之卜正也薛庶姓也我不可以後之公使羽父請於薛侯曰君與滕君辱在寡人周諺有之曰山有木工則度之賓有禮主則擇之周之宗盟異姓爲後寡人若朝於薛不敢與諸任齒君若辱貺寡人則願以滕君爲請薛侯許之乃長滕侯

公羊其言朝何諸侯來曰朝大夫來曰聘

穀梁天子無事諸侯相朝正也考禮修德所以尊天子也諸侯來朝時正也植言同時也累數皆至也



胡傳

諸侯朝於諸侯禮乎孔子曰邦君為兩君之好

朝也

然謂之殷則得中而不過謂之世則終諸侯之

世而

一相朝其為禮亦節矣周衰典禮大壞諸侯放

恣無

禮義之交惟強弱之視以魯事觀焉或來朝而

不報

其禮或屢往而不納以歸無合於中聘世朝之

制矣

且列國於天子述所職者蓋闕如也而自相朝

聘可

乎凡大國來聘小國來朝一切書而不削皆所

以示

識滕薛二君不特言者又識旅見也非天子不

旅見

諸侯偃然受之而不辭亦以見隱公之志荒矣

集說

孔氏穎達曰十下言有者干寶云十盈則更始

以奇

從盈數故言有也經備文傳從略故傳不

言有

桓七年穀伯鄧侯別言來朝此魚言來朝者彼

別行

禮此同行禮由同時行禮當長者先故爭之

衛敵

孫氏復曰齊晉宋衛未嘗來朝魯者齊晉盛也宋

滕薛

邦杞來朝奔走而不暇者土地狹陋兵

衆寡弱不能與魯抗也。劉氏敞曰：其言朝何？王者之制諸侯，歲相問殷相聘，世相朝。其無言之何？譏何也？又曰：左氏曰：公使羽父請於薛侯，曰：周之宗盟，異姓為後。乃長滕侯，皆非禮也。晉侯使荀庚來聘，衛侯使孫良夫來聘，魯尚不敢同日而與之盟。豈有南面之君來朝而令同日並見耶？異姓為後，固應為朝天子時耳。魯不當旅見二君，又不當引天子自況。孫氏覺曰：外之朝天子者，不見於經內之朝天子者，二而已。又皆在於王所，而不在於京師。其如京師者，一而已。又因會伐秦而遂行，由此觀之，當時朝覲之禮，一施於強國，天子名存而已也。聖人因其實而書之以罪之也。程子曰：諸侯雖有相朝之禮，而當時諸侯於天子未嘗朝覲，獨相率以朝魯，得為禮乎？張氏洽曰：凡諸侯朝各書之，若穀、鄧、偕至而朝，禮不同日也。累數之，若邾、牟、葛及今滕、薛同日行禮，同日行。

禮惟天子可受之諸侯不當然也今隱公於天子未嘗朝覲而滕薛相率以朝又不特見而使同日旅見非禮甚矣家氏鉉翁曰周家盛時諸侯有歲相問殷相聘世相朝之禮曰相云者亦往復之義非若諸侯之朝天子也至於衰世大國未嘗朝王小國乃相率而朝大國大國倨受其朝而不以為僭如滕薛之朝魯是也汪氏克寬曰滕朝者四杞邾朝者各七曹小邾朝者各五邾朝者二薛紀穀鄧鄆鄫蕭叔之朝各一魯皆未嘗報聘又曰齊侯鄭伯如紀亦兼言之豈旅見於紀乎蓋書二君來朝則是並行朝禮書二君如紀不過同往紀國非並行朝禮也然僖二十八年兩朝王所皆諸侯並朝襄二十八年公如楚亦諸侯同往經皆不書他諸侯者春秋主魯書魯以見其餘耳劉氏實曰伐戴入邾小國皆懼此二國所以皆來朝也

夏公會鄭伯于時來

公穀夏字下有五月字時來公作祁黎左文作邾時來杜注邾也

榮陽縣東有釐城鄭地也在  
今河南開封府東四十里

左傳

夏公會鄭伯于邾謀伐許也鄭伯將伐許五月甲辰授兵於大宮公孫闕與潁考叔爭車潁考

叔挾輶以走子都拔棘以逐之及大逵弗及子都怒

集說

孫氏覺曰隱之出十二皆不致隱志讓乎桓不欲當正君之禮聖人本其意而略之也吳氏

澂曰鄭莊以小利餌魯隱既與之伐宋為鄭報怨矣又將與之同伐許為鄭益地許與鄭接壤鄭之所利齊魯無與焉者也鄭伯以計鉤致齊魯之君而借其兵力吞併小國以利益於己甚哉鄭之不仁而齊魯之不知也劉氏實曰凡稱會外為主時來鄭地則知伐許鄭之志也蓋許與鄭接壤鄭之所利故也

秋七月壬午公及齊侯鄭伯入許

許杜注潁川許昌縣今河南開封府許州

故許城在州東北四十里孔疏譜云許姜姓與齊同祖堯四岳伯夷之後也周武王封其苗裔文叔於許

左傳

秋七月公會齊侯鄭伯伐許庚辰傳于許潁考叔取鄭伯之旗登弧以先登子都自下射之顛

瑕叔盈又以登弧登周麾而呼曰君登矣鄭師畢登壬午遂入許許莊公奔衛齊侯以許讓公公曰君謂

許不共故從君討之許既伏其罪矣雖君有命寡人弗敢與聞乃與鄭人鄭伯使許大夫百里奉許叔以

居許東偏曰天禍許國鬼神實不逞於許君而假手於我寡人寡人唯是一二父兄不能共億其敢以許

自為功乎寡人有弟不能和協而使餬其口於四方其況能久有許乎吾子其奉許叔以撫柔此民也吾

將使獲也佐吾子若寡人得沒於地天其以禮悔禍於許無寧茲許公復奉其社稷唯我鄭國之有請謁

焉如舊昏媾其能降以相從也無滋他族實偏處此  
以與我鄭國爭此土也吾子孫其覆亡之不暇而況  
能禋祀許乎寡人之使吾子處此不唯許國之為亦  
聊以固吾圉也乃使公孫獲處許西偏曰凡而器用  
財賄無寘於許我死乃亟去之吾先君新邑於此王  
室而既卑矣周之子孫日失其序夫許大岳之胤也  
天而既厭周德矣吾其能與許爭乎鄭伯使卒出  
殯行出犬雞以詛射潁考叔者君子謂鄭莊公失政  
刑矣政以治民刑以正邪既無德政又  
無威刑是以治民刑以正邪既無德政又

胡傳書會則伐許者本鄭志也書及則入許者公所  
欲也隱公即位十有一年天王遣使來聘者再  
而未嘗朝於京師罪一也平王崩不奔喪會葬致使  
武氏子來求賻罪二也禮樂征伐自天子出而擅興  
兵甲為宋而伐邾為鄭而伐宋罪三也山川土田各  
有封守上受之天王下傳之先祖而取郕及防入枋

易許罪四也今又入人之國而逐其君罪五也凡此五不韙者人臣之大惡而隱公無有之然則不善之殃豈特始於惠成於桓而隱之積亦不可得而掩矣

集說

杜氏預曰與謀曰及還使許叔居之故不言滅也孔氏穎達曰傳稱會于邾謀伐許是公與

謀也趙氏匡曰諸侯無王命入人之國罪已大矣又使大夫守之不容誅矣而左氏以為有禮是長亂階也劉氏敞曰傳曰鄭伯使許大夫百里奉許叔以居許東偏君子曰鄭莊公於是乎有禮非也許若有罪鄭已破其國即當請王而立君許若無罪鄭固不當妄破其國妄逐其君今許罪不可知而專為威福政不由王而制於己私其邊圉之固皆大罪也何謂知禮乎杜氏諤曰書公及者目公主之也書公而齊鄭稱人則後世必以公及微者故目其爵所以鈞其譏之義譏在書入而不在稱爵也程子曰

書及內為主也非內為主則先書會伐後書入也  
王氏葆曰前之伐宋鄭助魯以取二邑今之入許魯  
助鄭以奄鄰壤稱及志公之所欲也陳氏傅良曰  
以王命討不庭顧因以為暴許無君者十有五年甚  
矣鄭之專也許莊公奔衛不書非其罪也凡奔非其  
罪不書是故許男奔衛不書須句子奔魯不書呂  
氏祖謙曰鄭入許而不有許此一段看得王綱初解  
紐諸侯亦未敢放手滅人國如後之滅霍滅耿滅魏  
略無顧忌吳氏澂曰欲得許地者鄭之本謀遂破  
許國者鄭之專功將以借齊魯兵力以同伐齊以國  
大爵尊為主兵既入許鄭莊陽不有其功而讓與齊  
齊侯以克許非已功而不敢受乃以讓魯魯又以克  
許非已功而不敢受乃以與鄭鄭即受之而不辭竟  
得遂其貪土地之志書入不書滅者許君既奔他國  
鄭雖專有其地而使許君之弟奉其宗廟不絕其祀  
也入者亡國之善辭何善也以為猶愈於取其土地



而并絕其宗祀者爾 李氏廉曰春秋一事而始書會後書及惟此年及桓元年垂越之會盟皆所以著內外之志也桓十二年會武父至伐宋則書及例與此同桓十六年會曹夏伐鄭則仍書會非獨魯之所欲矣此可以見書法之謹也 王氏錫爵曰公以許與鄭蓋償前日郕防之取又曰鄭伯入國逐君擅使大夫守之無君甚矣且設為姦詞內防其患而外利其名所謂刺人而復捫之以手也何名為有禮而張氏溥曰三國同伐許鄭不能獨有之又畏齊之逼已使獲佐許叔以居外有存國之名而許實屬鄭齊魯莫與之爭此鄭莊公所

以善用兵為名諸侯也

附錄左傳

王取鄆劉蕢邾之田於鄭而與鄭人蘇忿生之田溫原絺樊隰郕欒茅向盟州陘隲

懷君子是以知桓王之失鄭也怒而行之德之則也禮之經也已弗能有而以與人人之不至不亦宜乎

鄭息有違言息侯伐鄭鄭伯與戰於竟息師大敗而還君子是以知息之將亡也不度德不量力不親不徵辭不察有罪犯五不韙而以伐人其喪師也不亦宜乎冬十月鄭伯以號師伐宋壬戌大敗宋師以報其入鄭也宋不告命故不書凡諸侯有命告則書不然則否師出臧否亦如之雖及滅國滅不告敗勝不告克不書於策

鄆杜注緱氏縣西南有鄆聚在今河南河南府偃師縣西南五十里劉杜注緱氏縣西北有劉亭維氏今屬偃師縣為杜注鄭邑當在今河南懷慶偃師孟縣之間邢杜注鄭邑今河南懷慶府河內縣西北三十里邢臺鎮古城也溫見前原杜注在沁水縣西今懷慶府濟源縣西北有原鄉緱杜注在野王今懷慶府河內縣西南三十里有緱城樊杜注一名陽樊野王縣西南有

陽城在今濟源縣東南三十八里 隰郛杜注在  
懷縣西南今懷慶府武陟縣西南十五里隰城是  
也 櫟茅杜注在修武縣北修武今屬懷慶府縣  
北二十里大陸村即其地也 向杜注軹縣西有  
地名向上今懷慶府孟縣西南有向城 盟杜  
注盟津在今懷慶府孟縣南十八里 州杜注州  
縣今故城在懷慶府河內縣東五十里 陘杜注  
關輿地太行陘在懷慶府西北三十里一名丹陘  
有故隕城 懷杜注懷縣今武陟縣西十一里有  
懷縣故城 息杜注息國汝南新息縣  
今河南汝寧府息縣西南七里有息城

# 冬十有一月壬辰公薨

左傳 羽父請殺桓公將以求大宰公曰為其少故也  
吾將授之矣使營菟裘吾將老焉羽父懼反譖

公於桓公而請弑之公之為公子也與鄭人戰於狐壤止焉鄭人因諸尹氏賂尹氏而禱於其主鍾巫遂與尹氏歸而立其主十一月公祭鍾巫齊於社園館於為氏壬辰羽父使賊弑公於為氏立桓公而討為氏有死者不書葬不成喪也

菟裘杜注魯邑在泰山梁父縣南今山東兗州府泰安州南泗水縣北有梁父城菟裘聚狐壤杜注鄭地後漢潁陰縣有狐宗鄉疑即此

公羊何以不書葬隱之也何隱爾弑也弑則何以不書葬春秋君弑賊不討不書葬以為無臣子也子沈子曰君弑臣不討賊非臣也不復讎非子也葬生者之事也春秋君弑賊不討不書葬以為不繫乎臣子也公薨何以不地不忍言也

殺梁

公薨不地故也隱之不忍地也其不言葬何也君弑賊不討不書葬以罪下也

胡傳

致隱讓國立不以正惠公之罪也致桓弑君幾不早斷隱公之失也既有讒人交亂其間憂虞

之象著矣而曰使營菟裘吾將老焉是猶豫留時辨之弗早辨也古者史官以直為職而不諱國惡仲尼筆削舊史斷自聖心於魯君見弑削而不書者蓋國史一官之守春秋萬世之法其用固不同矣不書弑示臣子於君父有隱避其惡之禮不書地示臣子於君父有不沒其實之忠不書葬示臣子於君父有討賊復讎之義非聖人莫能修謂此類也

集說

孔氏穎達曰他君見弑則書弑魯君見弑則書薨公薨例皆地此公又不地魯史策書所諱也

董狐書趙盾弑君仲尼謂之良史不書君弑則是史之不良夫子不改其文而因之者為人臣者或心實

愛君為諱愆過或志在疾惡故章賊名雖事跡不同而俱是為國聖賢兩通其事欲見仁非一塗僖元年傳曰諱國惡禮也以仲尼之善董狐知為史必須直也以丘明之禮諱惡知為史又當諱也啖氏助曰凡公葬皆書惟隱閔不書言賊不討如不葬然也陸氏淳曰淳聞於師曰元年有正夫子言隱當立而不行即位之禮十年無正譏隱合居其位而不正以貽其禍也劉氏敞曰何以不地弑也弑則何以不言弑不忍言也何以不書葬賊未討也賊未討則何以不書葬君弑臣討賊猶親弑子復讎也讎不復則何不葬不葬則服不除寢苦枕戈所以明為臣子也葬者臣子之終事也其義未終故不敢以急葬也程子曰人君終於路寢見卿大夫而終乃正終也薨於燕寢不正其終也薨不書地弑也賊不討不書葬無臣子也朱子曰凡魯君被弑則書薨而以不地著之蓋臣子隱諱之義聖人之微意也胡氏寧曰春

秋魯事多諱如公薨不地出奔稱孫滅國曰取易地言假之類非沒其實使後世無考證也但微婉其辭不直書耳是故內失地則不書師敗績則不書親送葬則不書朝而不見納則不書高氏閔曰君終不於正寢而於他處則著其不正終所以危之也至於不書地則知其為弑矣君見弑而忍言焉是無臣子之心故書薨而不地所以深罪當時在朝之臣而顯誅一時預弑之賊也賊未討不書葬見為人臣子者縱賊不問又使之得立為君皆甘心北面事之是與乎弑也一時臣子皆與乎弑則葬之者誰與雖葬猶不葬也汪氏克寬曰或以不地為缺文而謂隱公非弑是惑於明堂位魯君臣未嘗相弑之言爾記禮者不通春秋不地之義遂謂魯未嘗弑君也

案隱元年書正月餘皆不書正月公羊謂隱不有其正穀梁亦謂隱不自正皆非也隱在位十一年王命

凡五至身既不朝又無一介之使報禮於京師是列  
公之不奉正朔自隱始故不書正以示義焉非居攝  
之謂也

欽定春秋傳說彙纂卷三



欽定四庫全書

欽定春秋傳說彙纂卷四

桓公

集說

楊氏士勛曰魯世家桓公名允惠公之子隱公之弟以桓王九年即位世本作軌諡法辟土服

遠曰桓

庚桓王元年齊僖二十一年晉哀七年衛宣八年蔡桓四年鄭莊三十三年曹桓四十六年陳桓三年

十四年杞武四十年宋殤九年秦寧五年楚武三十年

春王正月公卽位

公羊

繼弑君不言即位此其言即位何如其意也

穀梁

桓無王其曰王何也謹始也其曰無王何也桓弟弑兄臣弑君天子不能定諸侯不能救百姓

不能去以為無王之道遂可以至焉爾元年有王所以治桓也繼故不言即位正也繼故不言即位之為正何也曰先君不以其道終則子弟不忍即位也繼故而言即位則是與聞乎弑也繼故而言即位是為與聞乎弑何也曰先君不以其道終已正即位之道而即位是無恩於先君也

胡傳

桓公與聞乎故而書即位著其弑立之罪深絕之也諸侯不再娶於禮無二適惠公元妃既卒

繼室以聲子則是攝行內主之事矣仲子安得為夫人母非夫人則桓乃隱之庶弟安得謂當立乎桓不當立則國乃隱公之國其欲授桓乃實讓之非攝也以其實讓而桓乃弑之春秋所以惡桓深絕之也公

羊所謂桓幼而貴隱長而卑子以母貴者徇惠公失禮而為之詞非春秋之法也春秋明著桓罪深加貶絕備書終始討罪之義以示王法正人倫存天理訓後世不可以邪汨之也

**集說**

何氏休曰弑君欲即位故如其意以著其惡直而不顯諱而不盈即者就也先謁宗廟明繼祖

也還之朝正君臣之位也事畢而反凶服焉杜氏預曰嗣子位定於初喪而改元必須逾年者繼父之業成父之志不忍有變於中年也孔氏穎達曰諸侯每歲首必有禮於廟今遭喪繼立者每新年正月亦改元正位百官以序故國史因書即位於策以表之此新君之常禮也今桓雖實篡立歸罪厲氏詐言不與賊謀而用常禮自同於遭喪繼位者亦既實即其位國史依實書之仲尼因而不改反明公實篡立而自同於常亦足見桓之篡也程子曰桓公實篡立而立不天無王之極也而書春王正月公即位以天

道王法正其罪也桓實與聞乎弑然聖人如其意而書即位與僖文等同辭則其惡自見乃所以深責之也朱子曰書即位者是魯君行即位之禮繼故不書即位者是不行即位之禮若桓公之書即位則是桓公自正其即位之禮耳家氏鉉翁曰此春秋誅討亂賊始見於魯事者也桓以臣弑君以弟篡兄罪大惡極而魯之先君也夫子於魯之先君不容直正其罪故特書王書正書即位皆所以討也桓在位十八年書王者四年不書王者十有四年書王明王法也不書王著桓無王與王不能以王法正天下也誅魯也亦責王也元年書王謂王誅當即加也二年書王憤魯誅之未及而宋亂又作也至三年王朝不聞有誅強之命而宰渠伯糾又下聘焉王法於是埽地天下無王矣自是不書王者七年至十年正月書王則以天道一周至十八年桓見殺於齊乃復書王正月言王誅雖不加而天理未嘗終泯其死於齊是亦

討也聖人於桓之弑隱書法特異於他或以不書王  
為簡編之脫誤春秋無深意不亦鹵乎又曰春秋比  
事以見褒貶隱不書即位所以明隱之能讓也桓書  
即位所以著桓之為篡也桓弑君篡國不當即位亦  
明矣春秋所以書即位絕之也季氏本曰桓公弑  
立姦黨輔之而諸臣亦無一人言大義者則其位安  
矣故逾年改元即位以正其始而魯無臣子於此見  
焉凡篡弑之賊春秋皆成之為君歐陽永叔曰魯桓  
公弑隱公而自立者宣公弑子赤而自立者鄭厲公  
逐世子忽而自立者衛公孫剽逐其君衎而自立者  
春秋皆不絕其為君夫弑者其罪於後世在乎不沒  
其實則四君之罪不可得而掩誠得春秋之意然所  
以得成為君者亦以國無二君也如昭二十  
三年敬王在國則尹氏立子朝不得稱王矣

### 三月公會鄭伯于垂

穀梁

會者何外為主焉爾

集說

葉氏夢得曰衛州吁弑桓公而立厚問定君於石碯石碯曰王艷為可於是教之使朝陳而請

艷曹負芻穀宣公之子而自立諸侯與會於戚而執之曹人請於晉曰若有罪則君列諸會矣亂臣賊子之所懼者天子與侯伯爾天子而與之艷諸侯與之會是既許之為君矣後雖有欲討者無所加兵焉此周之末造也宣公弑子赤而會齊侯於平州左氏以為宣公會齊人於是取濟西田以為賂左氏亦既言之桓之會鄭非齊之與宣會歟鄭伯以璧假許田則濟西之會也高氏閼曰鄭伯知公之篡逆不自安特為好會將以求賂焉度魯急於會諸侯必從所欲故也夫鄭莊與隱公同盟和好今見其賊不能討反有所邀求欲以定其位是誠何心哉張氏洽曰公墓立而懼諸侯之討已欲外結好以自固因鄭伯

嘗歸枋以易許田而未遂乃求好於鄭鄭亦欲乘此  
機以求許田故會于垂篡弑之人凡民罔不慙而鄭  
莊首與為會故書公會鄭伯言出於鄭志所以深罪  
鄭伯也李氏廉曰魯與鄭特相會盟者惟桓公之  
編有四會垂盟越盟武父會曹是也鄭莊之結魯桓  
與魯桓之交鄭突皆黨篡逆之賊爾卓氏爾康曰  
桓公為仲子所生於宋更親宋鄭向以公子馮故互  
相構怨鄭於隱十年已伐宋今不結魯虞魯尤助宋  
以相難魯固鄭所急欲善也隱公因陰結鄭况桓公  
身抱大惡又為宋親不交鄭鄭必仗大義以難魯鄭  
又魯所急欲善也故有是會

### 鄭伯以璧假許田

左傳

公即位修好於鄭鄭人請復祀周公卒易枋田  
公許之三月鄭伯以璧假許田為周公枋故也

公羊

其言以壁假之何易之也易之則其言假之何

也許田者何魯朝宿之邑也諸侯時朝乎天子天子

之郊諸侯皆有朝宿之邑焉此邑也其稱田何田多

邑少稱田邑

穀梁

假不言以言以非假也非假而曰假諱易地也

禮天子在上諸侯不得以地相與也無田則無

許可知矣不言許不與許也許田者魯朝宿之邑也

邠者鄭伯之所受命而祭泰山之邑也用見魯之不

朝於周而鄭之不祭泰山也

胡傳

許田所以易祊也鄭既歸祊矣又加壁者祊薄

於許故也魯山東之國與祊為鄰鄭畿內之邦

許田近地也以此易彼各利於國而聖人乃以為惡

而隱之獨何歟曰利者人欲之私放於利必至奪攘



而後厭義者天理之公正其義則推之天下國家而可行湯沐之邑朝宿之地先王所錫先祖所受私相貿易而莫之顧是有無君之心而廢朝覲之禮矣是有無親之心而棄先祖之地矣故聖人以為國惡而隱之也其不曰以壁易田而謂之假者夫易則已矣言假則有歸道焉又以見許人改過遷善自新之意非止隱國惡而已也其垂訓之意大矣

### 集說

杜氏預曰魯不宜聽鄭祀周公又不宜易取枋田犯二不宜以動故隱其實不言枋稱壁假言

若進壁以假田非久易也孔氏穎達曰枋薄於許加之以壁易取許田非假借之也不言以枋假而言以壁假者此壁實入於魯諸侯相交有執圭璧致信命之理故壁猶可言枋則不可言也枋許俱地以地借地易理已章非復得為隱諱故也劉氏敞曰易之者我也使其辭若自鄭出然是亦為之諱也又曰

公羊謂許田者魯朝宿之邑也謂之許者繫之許也  
非也詩云居常與許復周公之宇然則周公受封本  
有此許邑非孔子作春秋故繫之許也且地邑各自  
有名或曰許田或曰廼陰田據實而書豈擅改易哉  
蘇氏轍曰許田所以易祔也以祔為未足而益之  
以璧耳程子曰隱公八年鄭伯使宛來歸祔蓋欲  
易許田魯受祔而未與許及桓弒立故為會以求之  
復加以璧朝宿之邑先祖受之於先王豈可相易也  
故諱之曰假諱國惡禮也陳氏傅良曰取許田曷  
為謂之以璧假鄭伯之辭也公羊氏曰為恭也春秋  
之初諸侯之為惡必有辭焉以自文鄭伯以璧假許  
田齊侯鄭伯如紀單伯送王姬築王姬之館于外皆  
善辭也夫子傷周之敝曰利而巧文而不慙於春秋  
著其事以見王化衰風俗日趨於變且以發明鄭莊  
之欺也黃氏震曰許田鄰於鄭鄭莊久欲得之故  
以祔歸之取宋之郕防以予之得許而讓凡皆以投

隱公之欲而冀許田之得也隱公雖受祊取防郛而辭許鄭無得而強之隱沒而桓以篡立急於結援自固故許田卒為鄭所得黃氏澤曰歸祊後復書我入祊重取地假許後不書以許歸鄭重失地為內諱也

案加璧易許田孔氏穎達以為祊薄於許蘇氏轅胡氏安國皆從之陳氏傅良獨以為鄭伯自文之辭於當時情事亦合故並存其說

夏四月丁未公及鄭伯盟于越越杜注近垂地名當在山東兗州府曹州附近

左傳結祊成也盟曰渝盟無享國

穀梁及者內為志焉爾越盟地之名也

胡傳

垂之會鄭為主也故稱會越之盟魯志也故稱及鄭人欲得許田以自廣是以為垂之會桓公

欲結鄭好以自安是以為越之盟夫弑逆之人孟子所謂不待教命人得而誅之者也而鄭與之盟無俟於貶絕而惡自見矣

集說

杜氏預曰公以篡立而修好於鄭鄭因而迎之成禮於垂終易二田然後結盟程子曰桓公

欲結鄭好以自安故既與許田又為盟也弑君之人凡民罔不慙而鄭與之盟以定之其罪大矣王氏錫爵曰桓公弑立懼討故垂之一會既結鄭好自安而猶未可必信故既與許田又盟越以為定位計案越之盟左氏謂結祊成循其迹也穀梁謂內為志誅其心也鄭借易田之迹以行要求之心桓諱求盟之心而附結成之迹二傳似相異而意實相足也

秋大水

書水災之始

左傳

凡平原出水為大水

公羊

何以書記災也

穀梁

高下有水災曰大水

胡傳

大水者陰逆而與怨氣并之所致也桓行逆德而致陰沴宜矣或問堯之時豈有致之者而曰

洚水警予何也曰堯之水非有以致之閭閻以來水之行未得其所歸故堯有憂焉使禹治之然後人得

平土而居爾若曰洪水者積雨之所成時暘而熄矣奚待乎九年十有三載之治也山谷之所洩歟自禹

功既施疏鑿決排以至於今而其流不減何也是知天非為堯有洪水之災至禹而後水由地中行爾後

世有人為不善感動天變召水  
溢之災者必引堯為解誤矣

集說

范氏甯曰禮月令季秋行夏令則其國大水  
孫氏復曰水不潤下也昔者聖王在上五事修

而彝倫叙則休驗應之故曰肅時雨若又時暘若哲  
時燠若謀時寒若聖時風若若聖王不作五事廢而  
彝倫攸斁則咎驗應之故曰狂恒雨若僭恒暘若豫  
恒燠若急恒寒若蒙恒風若若春秋之世多災異者  
聖王不作故也然自隱迄哀天下之災異多矣悉書  
之則不可勝其所書矣是故孔子惟曰食與內災則  
詳而書之外災則或舉其一或舉於齊鄭宋衛則天  
下之異從可見矣孫氏覺曰大者非常之辭水非  
常而為災或害禾稼敗廬舍凡為災則書之也水者  
陰也陰之盛至於大水而為災則陽不勝陰而陰專  
盛矣聖人既著其為災之跡又以見當時天下有召  
災之實春秋之間一魯國之小而大水者八天下之

災又可勝紀乎 程子曰君德修則和氣應而雨暘  
若桓行逆德而致陰沴乃其宜也 家氏鉉翁曰不  
書月槩一秋而言也傷人害物而後書 汪氏克寬  
曰書時不書月則水之汎濫為害蓋歷時而未平也  
經書內大水者八後此十三年書夏此年莊七年二  
十五年宣十年成五年皆書秋莊十一年宋大水亦  
書秋惟莊二十四年紀於八月姜氏入之後襄二十  
四年紀於七月日食之後書月者未至歷時之久然  
則非非常為災  
則不志也

## 冬十月

穀梁

無事焉何以書不遺時也春  
秋編年四時具而後為年

集說

俞氏皋曰雖無事必書時書首月而  
成歲其有四時不具者蓋闕文也

附錄左傳

冬鄭伯拜盟

辛桓王二年

齊僖二十一年晉哀八年衛宣九年蔡桓未十年鄭莊三十四年曹桓四十七年陳桓

三十五年杞武四十一年宋殤十年秦寧六年楚武三十一年

春王正月戊申宋督弑其君與夷及其大夫孔父

左傳

宋華父督見孔父之妻於路目逆而送之曰美而艷二年春宋督攻孔氏殺孔父而取其妻公

怒督懼遂弑殤公君子以督為有無君之心而後動於惡故先書弑其君

公羊

及者何累也弑君多矣舍此無累者乎曰有仇牧荀息皆累也舍仇牧荀息無累者乎曰有有

則此何以書賢也何賢乎孔父孔父可謂義形於色矣其義形於色奈何督將弑殤公孔父生而存則殤



公不可得而弑也故於是先攻孔父之父正色而立於朝父死已必死趨而救之皆死焉孔父正色而立於朝則人莫敢過而致難於其君者孔父可謂義形於色矣

**穀梁**

孔父先死其曰及何也書尊及卑春秋之義也孔父之先死何也督欲弑君而恐不立於是乎

**先殺**

孔父

**胡傳**

桓無王而元年書春王正月以天道王法正桓公之罪也桓無王而二年書春王正月以天道

王法正宋督之罪也宋瑒公立十年十一戰民不堪命孔父為司馬無能改於其德非所謂格君心之非者然君弑死於其難處命不渝亦可以無媿矣父者名也著其節而書及不失其官而書大夫是春秋之所賢也督將弑瑒公孔父生而存則不可得而弑於是乎先攻孔父而後及其君能為有無亦庶幾焉凡

亂臣賊子畜無君之心者必先翦其所忌而後動於  
惡不能翦其所忌則有終其身而不敢動也華督欲  
弑君而憚孔融此數君子者義形於色皆足以衛宗社而  
憚孔融此數君子者義形於色皆足以衛宗社而  
忤邪心姦臣之所以憚  
也不有君子其能國乎

集說

范氏甯曰姦逆之人王法所宜誅故書王以正  
范氏邵曰會盟言及別內外也尊卑言及

上下序也孔氏穎達曰凡言其者是其身之所有  
君是臣之君故臣弑君則云弑其君臣是君之臣故  
君殺臣則云殺其大夫子亦君之子故云殺其世子  
稱國稱人以殺亦言其者人與國竝舉一國之辭君  
與大夫皆是國人所有故亦言其也若兩臣相殺死  
者非殺者所有則兩書名氏不得言其若王札子殺  
召伯毛伯是也與夷是督之君言弑其君則可孔父  
非督之大夫而言及其大夫者與君俱死據君為文

言宋督弑其君據督為文而上弑其君也言及其大夫孔父據君為文而下及其大夫言及與其大夫非督之大夫也又曰諸言父者雖或是字而春秋之世有齊侯祿父蔡侯考父季孫行父衛孫林父乃皆是名故杜以孔父為名陸氏淳曰穀梁曰何以知其先殺孔父也臣既死君不忍稱其名案趙子曰孔父之事自是史冊載之非殤公自書也何闕君之不忍乎又曰不稱名蓋為祖諱也案春秋魯史非孔子家傳安得祖諱乎劉氏敞曰及者何累也何以書賢也何賢乎孔父之智則衆孔父之忠則盡矣託六尺之孤寄百里之命知必死而不避孔父可謂處命不渝矣春秋賢者不名孔父者所賢也則其名之何父前子名君前臣名杜氏云孔父稱名內不能治其閨門外取怨於民身死而禍及君故貶之非也春秋雖以字為褒然已名其君於上不得字其臣於下此所謂君前臣名禮之大節也用杜氏之意者乃

當名君字大夫顛倒人倫乎其不通經亦已甚矣  
蘇氏轅曰此弑其君與殺其大夫其言及何也由弑  
及之也公羊曰孔父字也其不名賢也諸侯不生名  
死猶名之大夫生名死而名正也孔父之死何賢而  
字乎且方名其君而字其臣禮乎程子曰桓公無  
王而書王正月正宋督之罪也弑逆之罪不以王法  
正之天理滅矣督雖無王而天理未嘗亡也人臣死  
君難書及以著其節父名也稱大夫不失其官也  
陳氏傅良曰華督則曷為但稱督隱桓莊之春秋凡  
賊皆名之張氏洽曰初宋穆公舍馮而立與夷使  
馮出居鄭與夷既立而鄭莊公欲納馮於宋於是自  
隱四年以後鄭宋屢相侵伐華督蓋馮之黨也將弑  
與夷而憚孔父故先攻殺孔父殤公怒則弑之遂召  
馮而立焉書與夷之弑而後及孔父明孔父之死為  
君故所以著其節也家氏鉉翁曰桓王伐鄭以師  
從者猶有蔡衛陳使是時王能以誅討二篡號召天

下名之正言之順諸侯大國必將來會允馮督輦可  
坐而翦也惟其無志於此王綱日壞主威日削凶彙  
日繁春秋所為作是故耳又曰此春秋誅亂賊崇  
死節之始也公羊得表章死節之意汪氏克寬曰  
或謂孔父不當蒙弑文夫苟書曰宋督弑其君與夷  
遂殺其大夫孔父則不見孔父為君而死而大臣扞  
君之節不著矣故特書及以褒其死君難此聖筆之  
精意也湛氏若水曰以臣弑君人倫之大變書春  
王正月戊申以時月日紀其實大變不可不詳史之  
法也季氏本曰春秋書死難者三孔父仇牧荀息  
皆忠於所事而無二心者也凡非  
其本心與動於私者皆不預焉

案穀梁以孔父為字趙氏匡駁之是矣左氏以父為  
名杜氏預因為罪孔父之說亦非也惟劉氏敞君前  
臣名之說最為精當故程子及蘇氏轍胡氏安國皆  
用之啖氏助則云孔字父美稱也孔氏之先皆以字

連父故有弗父金父若孔為氏豈世世改乎又春秋時名嘉者多字孔是其證也此說甚詳核然名君而字臣於義終未安故主劉傳而啖氏之說附存於此

# 滕子來朝

集說

杜氏預曰隱十一年稱侯今稱子者蓋時王所黜

其黜陟此時周德雖衰尚為天下宗主滕今降爵明是時王所黜也葉氏夢得曰滕侯國何以稱子時王貶之也諸侯一朝則貶其爵宗廟有不順亦絀以爵焉周道也滕侯必居一於此矣王政不行於諸侯何以能加於滕春秋之小國猶有聽命焉者也故杞於桓以侯見至僖而書子薛於隱以侯見至莊而書伯與是為三皆微國也大國則莫見焉杞與僖以子見至文則復書伯亦以是進之也自文以後雖三

國亦莫行則周益衰矣或者以為進退皆春秋夫爵王命也可春秋而專之乎以春秋為可專則諸侯之惡有大於此三國者何以不貶或曰小白伯而正王爵杞薛蓋終小白之世未嘗與齊通也朱子曰滕子來朝或以春秋惡其朝桓特削而書子自此之後滕一向稱子豈春秋惡其朝桓而并後代子孫削之乎或以為當喪未君前又不見滕侯卒皆不通之論李氏廉曰案滕稱子杜氏與穀梁同張氏與胡氏同張氏之說發明胡氏然春秋善善長惡惡短先王罰弗及嗣安有一人之罪而世子孫受貶黜乎趙子以滕子此朝為在喪而後日齊桓霸後方與杞薛皆降號以從會此亦為有見者而在喪之說鑿矣故沙隨程可久以為春秋時大國強暴每責賦於小國小國不堪多自降爵以從殺禮引子產爭承以為證盖亦用趙子意朱子極取之然考之於經諸侯降爵惟滕薛杞滕初稱侯自桓二年始稱子薛初稱侯至

莊三十一年始書伯以爲自降可也杞初稱侯至莊  
 二十七年稱伯而僖二十三年卒稱子文十二年稱  
 伯而襄二十九年來盟又稱子其升降不一比前說  
 又不通矣且二邾皆自附庸升而爲子傳者以爲齊  
 桓請於天子命爲諸侯由是觀之則又似時王黜陟  
 之說亦可行姑記所聞以俟知者又曰程子以滕稱  
 子爲臣屬於楚朱子曰滕未嘗服楚不知何據卓  
 氏爾康曰灌甫曰案樂正子記滕薛旅朝隱公桓王  
 聞之徵朝滕以子往薛以伯往王怒皆黜焉以子往  
 以伯往自貶之說王怒皆黜焉時王所黜之說也因  
 其子往而貶之尤易爲力樂正所記可作兩證陳  
 氏際泰曰胡文定貶滕子之說非徒刻也又復頗甚  
 滕侯不得已而朝也則與紀侯等也無罪焉爾已其  
 爲桓而朝乎宜在穀鄧二侯之列貶名足矣奈何子  
 之即子之而奈何終其身且世也滕孱國耳貶之  
 若是即前伐鄭四國與後成宋亂四國罪有大焉者



矣而又何無此峻刑乎即桓之身與桓之子若孫其又何罪之從此又必窮之獄也

案滕降稱子趙氏匡以為當喪未君程子以為後臣屬於楚胡氏安國以為貶其朝桓朱子皆駁之獨取程氏迥自貶以省貢賦之說於情事為近而揆諸春秋之義例亦有不可通者五等之列周有定制春秋不聽諸侯之自尊而獨聽其自貶耶故惟杜氏預楊氏士勛為時王所貶之說為得其實胡氏安國曰時王能黜諸侯則春秋不作夫東周之替也齊晉之霸實王命之儀父黎來實王爵之即其威不行於吳楚之遠且大若滕薛杞小邦以為時王所黜夫豈不可春秋之後又將百年周益卑矣三晉為侯猶請命焉况平桓之世東遷之初乎

三月公會齊侯陳侯鄭伯于稷以成宋亂

稷杜注宋地當在今歸德

府境

左傳

會于稷以成宋亂為賂故立華氏也宋殤公立

宰故因民之不堪命先宣言曰司馬則然已殺孔父而弑殤公召莊公於鄭而立之以親鄭以部大鼎賂公齊陳鄭皆有

賂故

遂相宋公

部杜

注國名濟陰城武縣東北有部城蓋部有二城北部城則為部國又南二里曰南部城則為宋

邑隱

十年取部是也俱在山東兗州府城武縣

公羊

內大惡諱此其目言之何遠也所見異辭所聞異辭所傳聞異辭隱亦遠矣曷為為隱諱隱賢

而桓賊也

穀梁

以者內為志焉爾公為志乎成是亂也此成矣取不成事之辭而加之焉於內之惡而君子無

遺焉

爾

胡傳

華督弑君之賊凡民罔不慙也而桓與諸侯會而受賂以立華氏使相宋公甚矣故特書其所

為而曰成宋亂夫臣為君隱子為父隱禮也此其目  
言之何桓惡極矣臣子欲盡隱之而不可以欺後世  
其曰成宋亂而不書立華氏猶為有隱乎爾春秋列  
會未有言其所為者獨此與襄公末年會於澶淵各  
書其事者桓弑隱督弑殤般殺景皆天下大惡聖人  
所為懼春秋所以作也一則受宋賂而立華氏一則  
謀宋災而不能討故特書其事以示貶焉然澶淵之  
會既不書魯卿又貶諸國之大夫而稱人此則書公  
又序諸侯之爵何也澶淵之會欲謀宋災而不討弑  
君之賊雖書曰宋災故而未能表其誅責之意也必

深諱魯卿而重貶諸國之大夫然後足以啓問者見  
是非也稷之會前有宋督弑君後有取宋鼎之事書  
曰成宋亂則其責已明不必諱公  
與貶諸侯之爵次然後見其罪矣

集說

何氏休曰宋公馮與督共弑君而立諸侯會于  
稷欲共誅之受賂便還今宋亂遂成桓公本亦

弑隱而立君子疾同類相養小人同惡相長故賤不  
為諱也古者諸侯五國為屬屬有長二屬為連連有  
帥三連為卒卒有正七卒為州州有伯也州中有為  
無道者則長帥卒正伯當征之不征則與同惡當春  
秋時天下散亂保伍壞敗雖不誅不為成亂今責其  
成亂者疾其受賂也加以者辟直成亂也徐氏邀  
曰春秋雖為親尊者諱然亦不沒其實故納鼎於廟  
躋僖逆祀及王室之亂昭公之孫皆指事而書孫  
氏復曰弑君之賊諸侯皆得討之宣十一年楚人殺  
陳夏徵舒是也此言公會齊侯陳侯鄭伯于稷以成

宋亂者惡不討賊也。劉氏敞曰：保人之賊，私人之賂，制人之上下，謂之成亂，則可謂之平亂，則不可。杜氏云：成平也，非也。春秋有輸平，又有暨齊平，又有公及齊侯平莒及郟，皆直稱平。若春秋欲諱受賂之惡，言其平，宋亂乃是矣。今不曰平而曰成，此豈平之謂乎？且案傳曰：會于稷，以成宋亂，為賂故立華氏也。此則傳以受賂立華氏解經之成宋亂也，豈不明哉？程子曰：宋弑其君而四國共成之，天下之大惡也。朱子曰：春秋大義數十如成宋亂，宋災故之類，乃是聖人直著誅貶，自是分明。陳氏傳良曰：向也合五國之君，大夫以定州吁而州吁託於討今也，合四國之君以立華督，督遂相宋莊弑君之禍，接迹於天下。四君為之也，春秋之褒貶至於慶文嚴矣，向也五國之君，大夫書之，復書之，終春秋僅一再見焉，以變文為猶未也，而直言其所為舍此無復見者矣。家氏鉉翁曰：督雖弑君而馮之位未定，今三國為此會。

將以謀宋而邀利而馮之位始定督之罪始得無討  
故成宋亂者三國也所以使三國成此亂者魯也穀  
梁曰以者內為志又曰公為志乎成此亂深得聖人  
之意邵氏寶曰春秋紀事書也而并言其意者有  
四事焉曰成宋亂也曰宋災故也曰釋宋公也曰伐  
楚以救江也皆不能已於言者也易曰繫辭焉以盡  
其言四事者近之卓氏爾康曰討弑者明正其罪  
莫如州吁以後弑君者輩出多不書矣成弑者明著  
其罪莫如于稷以後逆黨者輩出多不書矣春秋之  
初止記二條以為大法而已張氏溥曰是會也名  
定宋公實立華氏也魯桓弑君之賊與督同惡亟成  
宋亂非徒為督於己亦有利焉是故齊陳鄭受宋賂  
不書魯受部大鼎則書取書納詞重  
而不殺魯桓黨逆之罪深於三國也

夏四月取部大鼎于宋戊申納于大廟

左傳

夏四月取部大鼎于宋戊申納于大廟非禮也臧哀伯諫曰君人者將昭德塞違以臨照百官

猶懼或失之故昭令德以示子孫是以清廟茅屋大路越席大羹不致粢食不鑿昭其儉也衮冕黻珽帶裳幅舄衡紃紼昭其度也藻率鞞鞶屬游纓昭其數也火龍黼黻昭其文也五色比象昭其物也錫鸞和鈴昭其聲也三辰旂旗昭其明也夫德儉而有度登降有數文物以紀之聲明以發之以昭臨百官百官於是乎戒懼而不敢易紀律今滅德立違而寘其賂器於大廟以明示百官百官象之其又何誅焉國家之敗由官邪也官之失德寵賂章也部鼎在廟章孰甚焉武王克商遷九鼎於雒邑義士猶或非之而況將昭達亂之賂器於大廟其若之何公不聽周內史聞之曰臧孫達其有後於魯乎君達不忘諫之德以

雒邑杜注武王但營雒邑未有都城周公乃卒營雒邑謂之王城即河南城也今河南河南府洛陽

縣城內西偏即王城故址

公羊

此取之宋其謂之部鼎何器從名地從主人器何以從名地何以從主人器之與人非有即爾

宋始可以不義取之故謂之部鼎至乎地之與人則不然俄而可以為其有矣然則為取可以為其有乎曰

否何者若楚王之妻媢無時焉可也戊申納于大廟何以書譏何譏爾遂亂受賂納于大廟非禮也

穀梁

桓內弑其君外成人之亂受賂而退以事其祖非禮也其道以周公為弗受也部鼎者部之所

為也曰宋取之宋也以是為討之鼎也孔子曰名從主人物從中國故曰部大鼎也

胡傳

取者得非其有之稱納者不受而強致之謂弑逆之賊不能致討而受其賂器寘于大廟以明



示百官聖人直載其事垂訓後世使知寵賂之行係邪廢正能敗人之國家也亦或知戒矣

**集說**

杜氏預曰戊申五月十日孔氏穎達曰長歷此年四月庚午朔其月無戊申五月己亥朔十

日得戊申是有日而無月也劉氏敞曰此取之宋其謂之部大鼎何部所守之大鼎也武王克商封諸侯班宗彝以為子孫藏部以不義失之宋以不義得之雖久非其有也故謂之部大鼎程子曰四國既成宋亂而宋以鼎賂魯齊陳鄭皆有賂魯以為功而受之故書取以成亂之賂器寘於周公之廟周公其饗之乎故書納納者弗受而強致之也葉氏夢得曰鄭人以賂輸平於我而我從之故書鄭伯使宛來歸郕我責賂於宋以成其亂而宋與焉故書取部大鼎于宋有所刺於後必有所見於前其曰取于宋宋非我所得取也周公稱大廟魯公稱世室羣公稱宮魯道也廟之有器所以薦德不義而薦之是謂瀆其

祖納者以力強致之辭也  
家氏鉉翁曰前書成宋  
亂兼責四國也此書取部大鼎納于大廟專責魯也  
李氏廉曰春秋致賂例宋以部鼎賂公而書取在  
魯魯以濟西賂齊而書取在齊蔽罪於魯齊也齊致  
衛寶而書來歸結正諸  
侯之罪不獨在魯也

秋七月杞侯來朝

公穀作  
紀侯

胡傳

公穀程氏皆以杞為紀桓弟弑兄臣弑君天下  
之大惡王與諸侯不奉天討反行朝聘之禮則

皆有貶焉所以存天理正人倫也紀侯來朝何獨無  
貶乎當是時齊欲滅紀紀侯求魯為主非為桓立  
而朝之也

集說

劉氏敞曰左氏云杞侯不敬歸乃謀伐之九月  
入杞是也案公羊經紀侯來朝竊以謂當作紀

不當作杞春秋雖亂世至於兵革之事亦慎用之杞  
來朝魯有少不敬未宜便入其國也左氏誤紀為杞  
遂生不敬之說穀梁曰朝時此其月何也桓內弑其  
君外成人之亂於是為齊侯陳侯鄭伯討數日以賂  
已即是事而朝之惡之故謹而月之非也六年冬紀  
侯來朝猶是前紀侯耳猶是此桓公耳行不加進惡  
不差減而紀侯過而不改其責宜深深則宜日反書  
時何哉是豈春秋不惡之乎程子曰凡杞稱侯者  
皆當為紀杞爵非侯文誤也及紀侯大去其國之後  
杞不復稱侯矣吳氏澂曰齊謀并紀而鄭助之紀  
國小弱為齊鄭所謀度不能自存以魯與齊鄭睦故  
來朝魯將求茆焉李氏廉曰紀稱侯公羊注以隱  
二年考之紀本非侯爵此稱侯者天子將娶於紀故  
封之百里後恒稱侯而穀注亦以為蓋時王所進是  
皆不知紀子伯為闕文之故爾汪氏克寬曰成七  
年曹伯朝六年十八年定十五年邾子朝皆書月不

可以書  
月為貶

蔡侯鄭伯會于鄧

鄧杜注潁川召陵縣西南有鄧城今鄧襄城在河南開封府鄧城縣東南

三十五里公羊以鄧為國則  
五年鄧侯來朝即其君也

左傳

始懼  
楚也

楚杜注楚國南郡江陵縣北紀南城也孔疏譜云  
楚芊姓顓頊之後其後鬻熊事周文王早卒成王  
封其曾孫熊繹於楚以子男之田居丹陽南郡枝  
江是也熊通始稱武王武王居郢江陵是也今江  
陵縣屬荊州府紀南城在府  
北十里枝江縣亦屬荊州府

公羊

離不言會此其言  
會何蓋鄧與會爾

胡傳

案左氏曰始懼楚也其地以國鄧亦與焉楚僭號稱王憑陵江漢此三國者地與之鄰是以懼

也其後卒滅鄧虜蔡侯而鄭以王室懿親為之服役終春秋之世聖人蓋傷之也夫天下莫大於理莫強於信義循天理悖信義以自守其國家荆楚雖大何懼焉不知本此事醜德齊莫能相尚則以地之大小力之強弱分勝負矣

集說

何氏休曰時因鄧都得與鄧會自三國以上言會者重其少從多也杜氏預曰楚武王始僭

號稱王蔡鄭姬姓近楚故懼而會謀李氏廉曰楚自熊繹始受封六世至熊渠立其子康為句亶王紅為鄂王執疵為越章王此僭王之始又八世至熊儀是為若敖又二世至熊眡是為蚡冒又一世至熊通是為武王武王十九年入春秋侵隨於桓之六年合諸侯於桓之八年圍鄭敗鄧於桓之九年盟貳軫敗

鄧師蒲騷於桓之十一年伐絞伐羅楚已大於江漢之間矣莊公四年文王熊貲立莊六年而伐申莊十年而執蔡侯莊十六年而滅鄧於是楚勢益張他日爭伯之權輿始此 湛氏若水曰三國不守會同之大義不宜會而會以謀禦楚則終不免矣 季氏本曰蔡鄭鄧三國皆在楚北境而鄧尤近是時熊通始僭稱王憑陵江漢鄧先患之故為地主而會蔡鄭於其國不知蔡桓鄭莊本無遠慮不足與謀後五年鄧侯吾離奔魯蓋日迫於楚而轉託於周公之後矣

案公羊以為鄧與會胡氏安國及湛氏若水季氏本皆因之隱元年盟宿之例正與此合釋例以鄧為蔡地孔氏穎達遂謂鄧國去蔡甚遠蔡鄭不宜遠會其國都其說亦通

# 九月入杞

穀梁

我入之也

集說

杜氏預曰不稱主帥微者也程子曰將卑師少外則稱人內則止云入某伐某高氏閏曰

此年入杞八年入邾其辭雖略而罪有餘也夫桓弑君莫入莫伐而已乃入人伐人是使天下共蒙其恥也汪氏克寬曰或以為蔡鄭入杞然滅偃陽滅賴皆書遂此不書遂則入者魯也左傳謂討其來朝之不敬蓋因僖二十七年春杞子來朝秋公子遂帥師入杞而傳會其說耳

# 公及戎盟于唐

左傳

修舊好也

集說

陳氏深曰桓弑逆而懼人之討汲汲乎與戎盟以自固書之以示貶也吳氏澂曰隱公因戎

之請盟至再而後與盟今戎不請而桓及之盟蓋與及鄭盟越之意同以已之負大惡而結好以自固也

季氏本曰懼戎為患復修舊好

冬公至自唐

此書至之始

左傳

告於廟也凡公行告於宗廟反行飲至舍爵策勲焉禮也特相會往來稱地讓事也自參以上

則往稱地來稱會成事也

集說

杜氏預曰傳例曰告於廟也特相會故致地也凡公行不書至者皆不告廟也孔氏穎達曰

反行必告而春秋公行一百七十六書至者惟八十二耳其餘不書者釋例曰凡公之行不書至者九十九有四皆不告廟也隱公之不告謙也餘公之不告慢於禮也慢於禮者舉大例言耳若行有恥辱克躬罪



已不以告廟非為慢於禮也若事實可恥而不以為恥反行告廟則史亦書之宣五年傳曰公如齊高固使齊侯止公請叔姬馬夏公至自齊是不應告而告故書之以示過也釋例又曰桓公之喪至自齊此則死還告廟而書至者也莊公違禮如齊觀社用飲至之禮此則失禮之書至者也宣公黑壤之會以賂免諱不書盟而復書至亦諱不以見止告廟也襄公至自晉此則榮還而書至者也昭公至自齊居于郛此則宜告而書至者也僖十六年公會諸侯于淮未歸而取項齊人以為討而止公十七年聲姜以公故會齊侯于卞公始得歸而書公至自會是諱止而以會告也諸侯盟者必在會後皆書公至自會不言公至自盟者以盟是因會而為之公行以會告廟故還以會告至雖并以盟告亦不云至自盟為行時不以盟告故也僖二十八年公會諸侯于溫遂圍許經書公至自圍許襄十年公會諸侯于柤遂滅偃陽經書公

至自會二文不同釋例曰諸若此類事勢相接或以  
始致或以終致蓋時史之異耳無他義也定十二年  
公至自園成行不出境而亦告廟者釋例曰陪臣執  
命大都耦國仲由建墮三都之計而成人不從故公  
親伐之雖不越境動衆興兵大其事故出入皆告於  
廟也 啖氏助曰凡公行一百七十有六書至者八  
十有二不書至者九十有四左傳謂告廟則書於策  
夫子隨其所至以示功過且志其去國遠邇遲速也  
其有一出而涉兩事者或致前事或致後事擇其重  
者志之也又有不致本事者本事非功也十二公惟  
隱不告蓋謙讓不以人君之禮自處也其謙不以告  
或恥也或怠也 劉氏敞曰曷為或至或不至至禮  
也不至非禮也君行必告於廟反必奠而後入 劉  
氏絢曰君行其至必書於法當然也古之諸侯朝會  
有常節出入有常期周衰以後無法妄行征伐會盟  
紛紛四出棄社稷委人民往往起月踰歲而後得返

觀其所書而其亂自著矣劉氏永之曰夫時有遠近則史有詳略辭有同異此其易曉也自文以前君

行八十書至者十七文以後君行九十書至者六十四是也

案反行必告則史書其至不告則不書杜注孔疏甚明諸家紛紛或以為遠或以為久或以為危或以為幸失之鑿矣

附錄左傳

初晉穆侯之夫人姜氏以條之役生大子命之曰仇其弟以千畝之戰生命之曰成

師師服曰異哉君之名子也夫名以制義義以出禮禮以體政政以正民是以政成而民聽易則生亂嘉耦曰妃怨耦曰仇古之命也今君命大子曰仇弟曰成師始兆亂矣兄其替乎惠之二十四年晉始亂故封桓叔於曲沃靖侯之孫欒賓傅之師服曰吾聞國家之立也本大而末小是以能固故天子建國諸侯

立家卿寔側室大夫有貳宗士有隸子弟庶人工商各有分親皆有等衰是以民服事其上而下無覬覦今晉甸侯也而建國本既弱矣其能久乎惠之三十年晉潘父弑昭侯而納桓叔不克晉人立孝侯惠之四十五年曲沃莊伯伐翼弑孝侯翼人立其弟鄂侯鄂侯生哀侯哀侯侵陘庭之田陘庭南鄙啓曲沃伐翼

條杜注晉地今山西平陽府解州安邑縣有中條山縣北三十里有鳴條岡千畝杜注西河界休縣有地名千畝今平陽府介休縣有千畝原陘庭杜注翼南鄙邑翼即今平陽府翼城縣縣東南城志云即陘庭也

壬桓王十三年齊僖二十二年晉哀九年衛宣十年蔡申一年桓六年鄭莊三十五年曹桓四十八年

陳桓三十六年杞武四十二年宋莊  
公馮元年秦寧七年楚武三十二年

# 春正月

胡傳

昭桓公三年而後經不書王有以爲周不班歷者

書王非不班歷明矣又有以爲此闕文也安得一公  
之內凡十四年皆不書王其非闕文亦明矣然則云  
何桓公弑君而立至於今三年而諸侯之喪事畢矣  
是入見受命於天子之時也而王朝之司馬不施殘  
執之刑鄰國之大夫不聞有沐浴之請魯之臣子義  
不戴天反面事讎曾莫之恥使亂臣賊子肆其凶逆  
無所忌憚人之大倫滅矣故自是而後不書  
王者見桓公無王與天王之失政而不王也  
集說何氏休曰無王者以見桓公無王而行也二年  
有王者見始也十年有王者數之終也十八年

有王者桓公之終也孔氏穎達曰桓公元年二年十年十八年凡四年於春有王九年春無王無月其餘十三年雖春有月悉皆無王趙氏匡曰詳經意直以桓公不顧王法故去其王字以見其罪耳劉氏敞曰何以不書王桓無王也桓何以無王桓不受命於王也諸侯喪畢以士服見天子未受命不敢服其服也已見天子賜之黻冕圭璧然後服歸設奠於祖廟然後臨諸臣桓內弑其君外成人之亂弱天子而不受命則固無王也不書王見不受命也不受命雖久不得為諸侯二年有王未畢喪也又曰何休曰二年有王見始也不就元年見始者未無王也非也弑君之罪不輕於成人亂易地之惡不差於納鼎太廟而以為元年未無王輕重失序矣弑君見於即位成亂效於納賂易地著於璧假其迹已明雖使春秋歲輒書王其可謂桓有王乎然則不書王其不為此數事亦明矣程子曰桓公弑君而立元年書王以此

王法正其罪也二年宋督弑君以王法正其罪也三年不書王見桓之無王也家氏鉉翁曰王室微弱不能誅討亂賊元年二年猶書王望之也今魯隱喪事既終逆桓未能入見天子而明年春宰糾銜命下聘自是再三聘當誅而獎王綱盡矣天下不復知有王自是不書王示天下之無王也李氏廉曰案桓公惟元年二年十年十八年有王趙氏以為後人誤加其說已非而注穀梁者見二年書王以為正與夷之卒遂附會以為十年書王正終生之卒是又不知正弑逆之義矣注公羊者於十年十八年書王得之而元年書王以為桓公此時未敢無王至三年始著其無王之罪是又穿鑿之甚也故胡氏獨取程子又案范氏例春秋上下無王者凡一百有八桓無王見不奉王法餘公無王者為不書正月不得書王也宣亦篡位而不去者罪之輕重異也趙氏恒曰春秋之法莫嚴於弑君之賊故其立法則以天下無非當

討之人亦無往而非可討之時以當時之人言不但責之天王也而又責之鄰國責之魯國臣子其責之天王固為王法其責之鄰國與魯人亦王法也以可討之時言元年則書王三年以後不書王十年則書王十八年將終又書王其書王者固為示王法之當討其不書者亦為示王法之當討也

附錄左傳

春曲沃武公伐翼次於隄庭韓萬御戎梁弘為右逐翼侯於汾隄驂絰而止夜獲之

及藥  
共叔

汾隄杜注汾水邊釋例汾水出太原故汾陽縣至河東汾陰入河今汾水出太原府靜樂縣西南至府城西南流經汾州平陽二府至滎河縣北入河靜樂漢汾陽滎河漢汾陰也藥杜注晉地晉大夫欒氏封邑今直隸真定府藥城縣是也



公會齊侯于贏

贏杜注齊邑泰山贏縣今故城在山東泰安州東南五十里

左傳

會于贏成昏於齊也

集說

杜氏預曰公不由媒介自與齊侯會而成昏非禮也孫氏覺曰桓二年嘗與齊侯會于稷成

宋之亂於是復為之會而經不繫事秋七月遂有公子翬如齊逆女之事是於未婚之前而為此會也左氏曰成婚於齊是也桓公與齊謀婚而不由紹介之命媒妁之言身至齊境以與齊謀已之婚醜惡見矣張氏洽曰亂臣賊子與會而為婚若齊侯之罪也家氏鉉翁曰魯桓懼方伯之有討而乞昏於齊以為此會非媒而昏昏不以正也越境而會會不以正也使其私人往逆逆不以正也為齊侯而親迎迎不以正也是以春秋於贏之會謹之會謹而書之又曰是時鄭莊善用兵齊為強國故桓以賂結鄭以昏求

齊所以遣弑君之討而終殞於齊天也非人所能為也

衆會者外為志書會不書及當以張氏洽責齊之說為正蓋畏討者魯之情黨惡者齊之罪經意尤惡齊故獨書會

夏齊侯衛侯胥命于蒲

蒲杜注衛地在陳留長垣縣西南今直隸大名府長垣縣治故

蒲城是也

左傳

不盟也

公羊

胥命者何相命也何言乎相命近正也此其為近正奈何古者不盟結言而退

穀梁

胥之為言猶相也相命而信諭謹言而退以是為近古也是必一人先其以相言之何也不以是

齊侯命  
衛侯也

胡傳

公羊曰胥命者相命也相命近正也古者不盟結言而退人愛其情私相疑貳以成傾危之俗

其所由來漸矣有能相命而信諭豈不獨為近正乎故特起胥命之文於此有取焉聖人以信易食荅子

貢之問君子以信易生重桓王之失信去則民不立矣故荀卿言春秋善胥命

集說

何氏休曰盟不敵血但以命相誓善其不盟近正似於古而不相背故書以撥亂也范氏甯

曰江熙曰齊衛胥命雖有先倡倡和理均若以齊命衛則歸功於齊以衛命齊則齊僅隨從言其相命則

泯然無際矣楊氏士勛曰今二國相命則大者宜倡小者宜和大則齊也小則衛也故傳云不以齊侯

命衛侯也明齊大也但倡和理均故直以相命言之劉氏敞曰胥命者何相命也何言乎相命古者有

方伯有州牧有卒正有連率命於天子正也諸侯自相命非正也齊大公之後東州之侯也衛康叔之後北州之侯也以事相命也又曰齊侯衛侯胥命于蒲公羊以謂結言而不盟春秋善之也非也春秋亂世齊衛凡君會而相命蓋何足算陽穀之會公羊以謂遠國皆至桓公發禁於諸侯諸侯咸無用盟最盛矣豈非結言而退乎則何不謂之胥命哉蘇氏轍曰胥命者約言而不盟也有以相命故不可以言會未嘗歆血故不可以言盟程子曰二國為會約言相命而不為盟詛近於理也故善之朱子語類問張洽曰尋常如何理會是胥命曰嘗考之矣當從劉侍讀之說自王命不行則諸侯上僭之事由階而升然必與勢力之不相上下者共為之所以布於衆而成其僭也齊衛當時勢敵故齊僖自以為小伯而黎人責衛以方伯之事當時王不能命伯而欲自為伯故於此彼此相命以成其私也及其久也則力之能為

者專之矣故桓公遂自稱伯以至戰國諸侯各有稱  
王之意不敢獨稱於國必與勢力之相侔者共約而  
為之魏齊會於濁澤以相王是也其後七國皆王秦  
人思有以勝之於是使人致帝於齊約共稱帝自相  
命而至於相王自相王而至於相帝僭竊之漸勢必  
至此豈非其明證乎曰然則左傳所謂胥命於弭何  
也曰此以納王之事相遜相先也曰說亦有理汪  
氏克寬曰朱子意與程子傳稍異姑兩存之竊考莊  
二十一年鄭號胥命於弭同謀納王不可云相命以  
伯況齊衛胥命之後不聞有會盟侵伐之事僅能一  
戰于郎一盟惡曹皆以鄭忽之故則非相推為伯矣  
蓋胥命者相結以言而不盟而相結之善惡則存乎  
其事耳邵氏寶曰胥命一體也來言又一體也  
陳氏際泰曰于垂貶也書遇譏其簡禮也于蒲善也  
書胥命美其近正也

案公穀皆以胥命為善程子因之而胡傳亦主其說蓋比之屢盟長亂者為近古也張氏洽從劉氏敞之說謂彼此相命以成其私而極言其僭竊之所至朱子以為有理故竝存之

六月公會杞侯于郕

杞公作紀郕公作盛

集說

程子曰自桓公篡立無歲不與諸侯盟會結外援以自固也高氏閌曰紀侯懼齊欲親魯郕

亦然張氏洽曰紀與魯親而求援於魯以抗齊鄭故桓公因其二年來朝而與之會也汪氏克寬曰

程子云杞稱侯皆當為紀左傳云杞求成豈因入杞而傳會其說歟

案左穀俱作杞公羊獨作紀程子以為杞稱侯皆為紀當以公羊為是蓋齊魯方睦紀與郕皆畏齊故會魯而求庇也高氏閌之說得之

秋七月壬辰朔日有食之既

公羊

既者何  
盡也

穀梁

既者盡也  
有繼之辭也

胡傳

日者衆陽之宗人君之象  
而有食之既則其變大矣

集說

何氏休曰光明滅盡也  
范氏甯曰盡而復生  
謂之既孔氏穎達曰食既者謂日光盡也故

云既盡也月體無光待日照而光生半照即為弦全  
照乃成望為日光所照反得奪月光者歷家之說當  
日之衝有大如日者謂之闇虛闇虛當月則月必滅  
光故為月食張衡靈憲曰當日之衝光常不合是謂  
闇虛在星則星微過月則月食是言日奪月光故月  
食也若是日奪月光則應每望常食而望月亦有食

者由其道度異也日月異道有時而交交則相犯故日月遞食交在望前朔則日食望則月食交在望後望則月食後月朔則日食交正在朔則日食既前後望不食交正在望則月食既前後朔不食大率一百七十三日有餘而道始一交非交則不相侵犯故朔望不常有食也道不正交則日斜照月故月光更盛道若正交則日衝當月故月光即滅譬如火斜照水日斜照鏡則水鏡之光旁照他物若使鏡正當日水正當火則水鏡之光不能有照日之奪月亦猶是也日月同會道度相交月食是日光所衝日食是月體所掩故日食常在朔月食常在望也食有上下者行有高下謂月在日南從南入食南下北高則食起於下月在日北從北入食則食發於高是其行有高下故食不同也故異義云月高則其食虧於上月下則其食虧於下也日月之體大小正同相掩密者二體相近正映其形故光得溢出而中食也相掩疏者二



體相遠月近而日遠自人望之則月之所映者廣故日光不復能見而日食既也日食者實是月映之也但日之所在則月體不見聖人不言月來食日而云有物食之以自食為文闕於所不見也孫氏復曰凡日食人君皆當戒懼修德以消其咎程子曰既盡也食盡為異大也家氏鉉翁曰此書食既之始也李氏廉曰食既例三此年及宣八年七月襄二十四年七月皆大變也黃氏正憲曰列國分野上應列宿日月交會之辰亦各有所屬故日雖無所不照而所食之影在下觀之有正而多者有偏而少者當時所食之處必關於魯分居多故自魯觀之見其為既

案胡傳引穀梁不書朔不書日為夜食謂因朝日而知之者非也既曰見其虧傷矣則時刻可稽書朔書日無不可且使日食於亥子之交未出地而復明則雖朝日何從見其虧傷之處耶蓋日食不占夜猶月

食不占晝是以唐一行作厯上溯往古  
千有餘年日食長在晝月食長在夜也

### 公子翬如齊逆女

胡傳

娶妻必親迎禮之正也若夫邦君以爵則有尊卑以國則有大小以道途則有遠邇或迎之於

其國或迎之於境上或迎之於所館禮之節也紀侯於魯以小大言則親之者也而使履緌來魯侯於齊以遠邇言則親之者也而使公子翬往是不重大昏之禮失其節矣故書

集說

范氏甯曰翬稱公子者桓不以為罪人也孔氏穎達曰天子尊無與敵不自親迎使卿逆而

上公臨之諸侯則親逆有故得使卿八年祭公逆王后于紀傳曰禮也是當使人天子不親逆也襄十五年傳曰官師從單靖公逆王后于齊卿不行非禮也是知天子之禮當使卿逆而上公臨之也禮記哀公

問曰冕而親迎不已重乎孔子對曰合二姓之好以繼先聖之後以為天地宗廟社稷之主君何謂已重乎此對哀公指言魯事是諸侯正禮當親迎也莊二十四年公如齊逆女丘明不為之傳以其得禮故也文四年逆婦姜于齊傳曰卿不行非禮也以卿不行為非禮知君有故得使卿逆也孫氏復曰是時文姜亂魯驪姬惑晉南子傾衛夏姬喪陳上下化之滔滔皆是不可悉舉也故自隱而下夫人內女出處之迹皆詳而錄之以懲以戒為萬世法劉氏敞曰左氏曰修先君之好故曰公子非也春秋非修先君之好而稱公子者多矣若修先君之好乃稱公子者輦帥師適其宜矣無謂疾之去氏也張氏洽曰君臣同哉隱公乃昏於齊以求配偶所謂不待貶絕而罪惡見者也俞氏皋曰在齊故稱女逆女為桓公逆夫人也李氏廉曰逆女例諸侯親迎當事不書書魯之逆者五惟莊逆哀姜以仇女為譏其餘若輦逆

文姜公子遂逆穆姜叔孫僑如逆齊姜皆卿為君逆也出姜不書逆者蓋公也識禮成於齊故不斥公也

遂為宣弑赤復為宣納賂逆婦以結齊援皆不待貶

絕而罪惡見者也陳氏際泰曰公子翬不宜逆女也輕也然公子翬尤不宜逆女也賊也

案紀履緌來逆女程子謂親迎於其所館豈有遠適他國以迎婦者張氏洽主其說洵為有理故此年公

子翬如齊逆女凡以不親迎為識者皆刪之

# 九月齊侯送姜氏于謹

謹杜注魯地濟北蛇丘縣西南下謹亭今濟南府肥城縣西南

有故城水經注云俗訛為夏暉城

## 左傳

齊侯送姜氏非禮也凡公女嫁於敵國姊妹則上卿送之以禮於先君公子則下卿送之於大

國雖公子亦上卿送之於天子則諸卿皆行公不自送於小國則上大夫送之

**公羊**

何以書譏何譏爾諸侯越竟送女非禮也此入國矣何以不稱夫人自我言齊父母之於子雖

為鄰國夫人猶曰吾姜氏

**穀梁**

禮送女父不下堂母不出祭門諸母兄弟不出闕門父母戒之曰謹慎從爾舅姑之言諸母般

申之曰謹慎從爾父母之言送女踰竟非禮也

**集說**

劉氏敞曰此入國矣何以不稱夫人未見廟猶未入國也葉氏夢得曰父而自送女非禮也

何以不稱夫人以齊侯為之辭也文公逆女于齊在國不言女已成禮也於文公則既成婦矣故書逆婦姜于齊姜宜稱女者也齊侯送女于誰入國不言夫人未成禮也於齊侯猶女矣故書齊侯送姜氏于誰

姜氏宜稱夫人者也是謂名正而言順  
杜氏諤曰魯逆失之輕而齊送失之過其貶固鈞者也

# 公會齊侯于謹

集說

程子曰齊侯出疆送女公遠會之皆非義也  
胡氏銓曰公果親逆自當書逆女必不曰會齊

侯也此直曰會見公因會齊侯而受姜氏耳  
張氏洽曰聖人制禮不可過不及齊僖愛其女之過  
至於越境而送之遂使魯侯之出不為親迎而為齊  
侯在謹特往會之僖公之送桓公之會皆非所以重  
大昏而正人倫之始春秋所以書之也  
姚氏舜牧曰魯桓意在結齊為援而娶其女故桓所行事重在  
會不在於婚

# 夫人姜氏至自齊

公羊

暈何以不致得見乎公矣

穀梁

其不言暈之以來何也公親受之於齊侯也子貢曰冕而親迎不已重乎孔子曰合二姓之好

以繼萬世之後何謂已重乎

胡傳

親迎之禮廢於是乎有父母兄弟越境而送其女者以公子暈往逆則既輕矣為齊侯來乃逆

而會之于讎是公之行其重在齊侯而不在姜氏豈禮也哉不言以至者既得見乎公也不能防閑於是乎在敝苟之刺兆矣禮者所以別嫌明微制治於未亂不可不謹也娶夫人國之大事故詳

集說

杜氏預曰告於廟也不言暈以至者齊侯送之公受之於讎孫氏復曰此齊侯送姜氏公受

之于讎也公受姜氏于讎不以讎至者不與公受姜氏于讎也故曰夫人姜氏至自齊以正其義胡氏

銓曰易曰漸女歸待男行也女歸必待男乃行夫人  
姜氏不與公俱至故先書公會齊侯于謹次書姜氏  
至自齊以見公會于謹本非親迎非易待男之義也  
薛氏季宣曰齊侯送女於外公以會禮接之非親  
迎且兩失之也夫婦大倫也不正之於其始桓之夫  
婦是不為夫婦矣吳氏澂曰昏禮之大節有三納  
幣一也親迎二也夫人至三也得禮則皆不書魯桓  
會贏書識不由媒介而自求昏於齊也逆女書識不  
親迎而使公子翬也送姜氏書識齊侯親送也會謹  
書識不親迎而親會齊侯也夫人至不書翬以識魯  
桓初使翬迎而中自受姜氏于謹也李氏廉曰夫  
人至例啖子曰夫人初至皆書經書夫人至三文姜  
得見公故不書翬以穆姜齊姜書遂僑如書以者言  
不當以也哀姜書入不可見乎宗廟也出姜不書至  
貶成禮於齊也昭公娶吳女不書至恥娶同姓也  
汪氏克寬曰文定此年傳謂娶夫人國之大事莊二



十四年傳謂婚姻常事不書蓋婚姻合禮而志者不書也桓公之娶姜不合於禮故以為大事而志之者所以垂戒而書法之變也昭公之娶同姓則又以國惡而隱之也聖人作經如化工生物洪纖高下因物賦形安可執一而論之哉王氏樵曰紫輦逆女齊侯送姜氏于謹公會齊侯于謹此文姜之始也公與夫人姜氏遂如齊公薨于齊此文姜之終也公如齊納幣公如齊逆女夫人姜氏入大夫宗婦觀用幣此哀姜之始也夫人姜氏孫于邾公子慶父出奔莒此哀姜之終也春秋據事而書讀者比事而觀而幾微著監戒昭矣張氏溥曰會羸逆女會謹夫人至齊僖公送女女既嫁使大夫聘問咸具志焉春秋惡文姜之終不得不詳其始

# 冬齊侯使其弟年來聘

左傳

聘冬齊仲年來聘致夫人也

集說

杜氏預曰古者女出嫁又使大夫隨加聘問存

來則總曰聘故傳以致夫人釋之孔氏穎達曰經書來聘傳言致夫人是行聘禮而致之也吳氏澂曰齊僖親送女至魯竟未幾又使貴介弟致之見其愛女之至情之私非禮之正也

有年

公羊

有年何以書以喜書也大年何以書亦以喜書也此其曰有年何僅有年也彼其曰大有年

何大豐年也僅有年亦足當喜乎恃有年也

穀梁

五穀皆熟為有年也

胡傳

舊史災異與慶祥並記故有年大有年得見於經若舊史不記聖人亦不能附益之也然十二

公多歷年所有務農重穀閏雨而書雨者豈無豐年而不見於經是仲尼於他公皆削之矣獨桓有年宣大有年則存而不削者緣此二公獲罪於天宜得水旱凶災之譴今乃有年則是反常也故以為異特存爾然則天道亦僭乎桓宣享國十有八年獨此二年書有年他年之歉可知也而天理不差信矣此一事也在不修春秋則為慶祥君子修之則為變異是聖人因魯史舊文能立興王之新法也故史文如畫筆經文如化工嘗以是觀非聖人莫能修之審矣有年大有年先儒說經者多列於慶瑞之門至程子發明與旨然後以為記異此得於言意之表者也

集說

何氏休曰桓公之行諸侯所當誅民人將去賴得五穀皆有使百姓安土樂業故喜而書之明

為國家者不可不有年 孔氏穎達曰年訓為稔謂  
歲為年者取其歲穀一熟之義賈云桓惡而有年豐  
異之也言有非其所宜有崇昭元年傳曰國無道而  
年穀和熟天贊之也是言歲豐為佐助之非妖異之  
物也君行既惡澤不下流遇有豐年報以為異是則  
無道之世惟宜有大饑非天佑下民之意也 楊氏  
士勛曰凡書有年者冬五穀畢入計用豐足然後書  
之不可繫以日月故例時也宣十六年冬大有年亦  
時是其證也 孫氏復曰桓立十八年唯此言有年  
者是未嘗有年也書者著桓公為國不能勤民務農  
若是也 程子曰書有年記異也人事順於下則天  
氣和於上桓弑君而立逆天理亂人倫天地之氣為  
之謬戾水旱凶災乃其宜也今乃有年故書其異宣  
公為弑君者所立其惡有間故大有年則書之 劉  
氏克莊曰桓有年宣大有年古史修以為祥仲尼筆  
以為異 王氏樵曰桓宣行惡宜得天譴固矣民則

何享天降之有年正見人不恤民而天勤之也考於  
經元年大水五年旱蠡八年建酉之月未霜而雪十  
有三年又大水十四年無冰御廩災咎徵疊見惟此  
年以有年書見年為民之命國之所以存亡而深為  
人君不德召  
災之戒也

案賈氏達曰言有非其所宜有程子因之而胡傳暢  
言之其持議甚正或疑以君之故而惡其民非聖人  
書法本意其實程胡二傳亦謂君惡召災而病民惟  
此有年為可異爾與公羊以喜書之意正同觀何氏  
休之說則兩  
不相悖矣

### 附錄左傳

芮伯萬之母芮姜惡芮伯之  
多寵人也故逐之出居於魏

芮杜注芮國在馮翊臨晉縣今陝西西安府同州  
朝邑縣有芮故城在黃河西岸魏杜注魏國在

河東河北縣括地志魏故國在芮城縣北五里今山西平陽府解州芮城縣河北故城是也孔疏世

本芮魏  
皆姬姓

癸桓王十四年齊僖二十三年晉小子侯元年衛宣十四年

十九年陳桓三十七年杞武四十四年  
宋莊二年秦寧八年楚武三十三年

春正月公狩于郎

此蒐狩之始

左傳

書時禮也

公羊

狩者何田狩也常事不書此何以書譏何譏爾遠也諸侯曷為必田狩一曰乾豆二曰賓客三

曰克君之庖

穀梁四時之田皆為宗廟之事也四時之田用三焉  
唯其所先得一為乾豆二為賓客三為克君之

庀

胡傳

何以書譏遠也戎祀國之大事狩所以講大事

以祭宗廟所以訓軍旅所以示之武而威天下取物  
以蒐中夏教於舍遂以苗中秋教治兵遂以獮中冬  
教大閱遂以狩然不時則傷農不地則害物田狩之  
地如鄭有原圃秦有具圃皆常所也達其常所犯害  
民物而百姓苦之則將聞車馬之音見羽旄之美舉  
疾首蹙頞而相告可不謹乎以非其地而必書是春  
秋謹於微之意也每謹  
於微然後王德全矣

集說

杜氏預曰冬獵曰狩行三驅之禮得田狩之時  
故曰書時禮也周之春夏之冬也田狩從夏時

郎非國內之狩地故書地孔氏穎達曰周之春正月建子即是夏之仲冬也周禮大司馬中冬教大閱遂以狩田是田狩從夏時也釋例曰三王異正朔而夏數為得天雖在周代於言時舉事皆據夏正故公以春狩而傳曰書時禮也隱五年公夫魚于棠傳曰言遠地也僖二十八年天王狩于河陽傳曰言非其地也舉地名者皆言其非地故知此郎非國內之狩地故書地也若國內狩地大野是也哀十四年傳曰西狩於大野經不書大野明其得常地故不書耳由此而言則狩于襍蒐于紅及比蒲昌間皆非常地故書地也田狩之地須有常者古者民多地狹唯在山澤之間乃有不殖之地故天子諸侯必於其封內擇隙地而為之僖三十三年傳曰鄭之有原圃猶秦之有具囿也是其諸國各有常狩之處違其常處則犯害民物故書地以譏之陸氏淳曰啖子曰蒐狩合禮者常事不書非時越禮而為之則書以示譏也趙



子曰四時之田其事各殊其名亦異春以閱武擇材  
故以蒐為稱夏以為苗除害故以苗為名秋則順天  
時以殺物故以獮為義冬則因守禽獸以習戰故以  
狩為目左氏曰春蒐夏苗秋獮冬狩是也公羊穀梁  
冬狩秋蒐竝同而苗則公羊在春穀梁在夏公羊則  
夏時無名穀梁則春曰田田者四時獵之總名不當  
專在於春故非也公羊之義夏時務農不苗然則自  
非緊急及有獸害苗則不苗也孫氏復曰狩冬田  
也天子諸侯四時必田者蓋安不忘危治不忘亂講  
武經而教民戰也豈徒肆盤遊逐禽獸而已哉然禽  
獸多則五穀傷不可不捕也故因田以捕之上以供  
宗廟之鮮下以除稼穡之害故田必以時殺必由禮  
田不以時謂之荒殺不由禮謂之暴惟荒也妨於農  
惟暴也殄於物此聖人之深戒也劉氏敞曰四時  
曷為必田狩春教振旅辨鼓鐸火弊以獻社夏教茂  
舍辨號名車弊以獻祔秋教治兵辨旗物羅弊以獻

枋冬教大閱總軍實徒弊以獻烝又曰公羊以謂春  
曰苗秋曰蒐冬曰狩非也周禮春蒐夏苗秋獮冬狩  
得其正矣周禮雖非仲尼所論著然制度麤存焉蓋  
周公之舊也仲尼嘗執之矣其有駁雜似周衰諸侯  
所增益也不足以害其大體蒐狩之名則吾從周禮  
記王制記四時之田亦復闕夏蓋王制出於漢時諸  
儒而諸儒承公羊之繆遂至於此不足以為據也  
程子曰公出動衆皆當書于郎遠也趙氏鵬飛曰  
昭九年築郎圃其後遂為田獵苑囿之地蓋基於今  
日之狩李氏廉曰四時之田春蒐夏苗秋獮冬狩  
見於周禮爾雅而左氏記賦僖伯之言亦同獨公穀  
所言皆不合穀疏曰左氏之文是周公制禮之名二  
傳之文或春秋取異代之法或當時天子諸侯別法  
經典散亡無以取正觀此則胡氏取周禮之說是矣  
又曰春秋書狩四于郎譏遠于禋譏親讎河陽本非  
狩特以避召王之名西狩本常事特以志非常之瑞

各有義耳 卓氏爾康曰四時之田止書蒐狩蒐狩  
經不多書其書者必有故也文公以後四公俱不書  
以大夫專國公不復知軍政時田得失無足議也昭  
公八年以後又復頻書是時三家分魯假春蒐之禮  
以耀武示強又與非時非地  
之蒐不同故頻書以示變耳

## 夏天王使宰渠伯糾來聘

胡傳

宰冢宰也渠氏伯爵糾其名也王朝公卿書爵  
大夫書字上士中士書名下士書人例也糾位

六卿之長降從中士之例而書名貶也於糾何貶乎  
在周制大司馬九伐之法諸侯而有賊殺其親則正  
之放弑其君則殘之桓公之行當此二者舍曰不討  
而又聘焉失天職矣操刑賞之柄以馭下者王也論  
刑賞之法以詔王者宰也以經邦國則有治典以安  
邦國則有教典以平邦國則有政典以詰邦國則有

刑典治教政刑而謂之典明此天下之大常也大宰所掌而獨謂之建以此典大宰之所定也乃為亂首承命以聘弑君之賊乎故特貶而書名以見宰之非宰也聘於弑君之賊而名其宰則桓公沒王使榮叔來錫命矣榮叔何以書字而不名也始而來聘冢宰書名以見貶終而退錫王不稱天以示識其義備矣夫咺贈仲子糾聘桓公其事皆三綱之所繫也然咺獨書官糾兼稱爵何也如咺者豈初得政猶未受封而糾則或以諸侯入相或既相而已封者乎漢初命相必擇列侯為之後用公孫因相而得封蓋欲放古重其任也任之重則責益深矣嫡妾之分君臣之義天下之大倫無所輕重糾以既封故兼稱爵見春秋責相之意也

集說

杜氏預曰國史之記必書年以集此公之事書首時以成此年之歲故春秋有空時而無事者

今不書秋冬首月史闕文也他皆放此 劉氏敞曰  
宰者何官也天子之宰也天子之宰通乎天下渠伯  
者何爵也糾者何名也天子大夫不名其曰宰渠伯  
糾何譏何譏爾桓內弑君外成人之亂又不受命王  
弗能討也而聘之是崇亂也參譏之又曰左氏曰父  
在故名非也武氏子來求聘言世武氏也仍叔之子  
來聘言幼弱也糾擅攝父位自取冢宰其貶猶應甚  
彼不得但以父在名之而已捨大責小非春秋也又  
曰公羊以謂下大夫也繫官氏名且字非也理不可  
書名而又書字仲尼之筆一何繁且迂至此哉又何  
氏休曰下去二時者為貶天子下聘也亦非也史有  
遺闕日月者仲尼皆不私益之日月無足見義而益  
之似不信故不為也 程子曰桓公弑君而立天子  
不能治天下莫能討而王使其宰聘之示加尊寵天  
理滅矣人道亡矣書天王言當奉天也而其為如此  
名糾尊卑貴賤之義亡也 朱子曰不書秋冬史闕

丈也或謂貶天子之失刑不成議論魯桓之弑天子  
不能討罪惡自著何待於去秋冬而後見乎張氏  
洽曰宰太宰也渠米地伯爵糾名也為天子之冢宰  
而不能詔王以八柄馭羣臣乃親奉命來聘魯桓故  
貶而名之也李氏廉曰宰糾書名左氏直識其攝  
父職以出聘已昧於仍叔子之文而杜注又以伯糾  
為名則伯乃字稱而非名也公穀皆以為下大夫繫  
官氏名且字以宰為官氏渠為名糾為字而以伯為  
老稱則單伯祭伯亦老稱乎蓋欲言微者而經稱伯  
欲言尊卿則連名故為是臆說耳是皆不知春秋責  
宰相之書法也趙氏恒曰桓公弑逆天王不討而  
又聘焉失天職矣其責當在天王然移其責於宰者  
蓋糾位高職重若能諫王必無來聘之失諫而不聽  
則辭位而去而所使者必非糾也今乃承命而來可  
知其為阿諛順旨而不忠不智不足為宰所以不貶  
王而貶宰也陳氏際泰曰天王終以桓公為嫡而不

可立故糾之聘也與賄之歸同聖人終以桓公非嫡而不當立故渠之名也與咺之斥同

案不書秋冬程子以為史闕文於義為正故劉氏敞及朱子

皆從之汪氏克寬歷舉全經闕文相校以申明程子之說終無確據

### 附錄左傳

秋秦師侵芮敗馬小之也冬王師秦師圍魏執芮伯以歸

秦詩譜曰秦隴西谷名徐廣曰天水隴西縣有秦

亭今鞏昌府秦州清水縣故秦城是也史記秦之

先伯翳佐禹平水土賜姓嬴氏後有大駘生非

子為周孝王主馬汧渭間分土為附庸邑之秦

欽定春秋傳說彙纂卷四